

Jesusa Akatramurí Yusa Wakaníjiai TÚRAMU

Yusa Wakanín nákasarmiania nu

¹ Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuitiampramiaj nunasha áatramiajme. Yámankamtaiknumia,

² nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakaní kakarmarijiai túratniua nuna ni akatramurín jintintiawarmiaiyi. ³ Tura jaka nantaki, Jesus tímiajaik wantintiukmiaiyi ni akatramurín. Tura kuarenta (40) tsawant nin wantintiukarmiaiyi. Nuna tura nekas iwiaakjai tusa iniakmasmiaiyi, nekaawarat tusa. Tura Yusa akupeamurí urukukit nuna mash ujakmiaiyi.

⁴ Jesuska ni akatramuríjiai tuke pujus, nin chicharuk “Jerusarénumia wéerap, tímiaiyi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaiyi.

⁵ Tuke enentáimsatarum. Juan entsajai atumí ayashín imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantin áintsankete” tímiaiyi.

Jesus nayaimpiniam wakamiania nu

⁶ Tura Jesusjaj irunar matsamas anintriarmiayi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiayi. ⁷ Jesus áimiuk tímiayi “Winia Apar túrattana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmarjiajn túrattawai. ⁸ Tura atumsha Yusa Wakaní kakarmarjn sunastatrume. Nii taa enkemprutmamtai kakaram ajasrum, Wíi túramu etserkattarme. Emka juí Jerusaréñ péprunam etserkattarme. Nuyá ashí Jutía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiayi Jesus.

⁹ Nuyá chichas amir, ashí ni akatramurjii wajainiaj, Jesus nayaimpinmaanjii junakmiayi. Wéa-wéakui yurankim mash Nin amuámiayi. Tuma asamtai ni akatramurjii Nin wáinkiacharmiayi. ¹⁰ Tura Jesus waakkui ni akatramurjisha yakí ii wajainiaj, jimiaraí áishman puju entsaru nujii wantintiukarmiayi. Tura ayamach wajattsarmiayi. ¹¹ Nu áishmansha Jesusa akatramurjii tiarmiayi “Kariréanmaya áishmanka, ¿urukamtaí nayaimpinmaanjii imiá íimprum? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiayi.

Matíasan anaikiarmiania nu

¹² Tuasua amikmatai Jesusa akatramurjii Uriwiu náinniumia akaikiar Jerusaréñnum waketkiarmiayi. Uriwiu naincha Jerusaréñnumsha tíjiuchiiti, chikichík kirumitrua núnisan. ¹³ Tura Jerusaréñnum jeawarmiayi. Nuji jeawar, jeá wayawar yakí wákararmiayi. Nuji Pítrusha,

Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachi Jútassha, tímian wayawarmiayi. ¹⁴ Jusha mash tuke iruniarmiayi Jesusa yachijjai. Tura Jesusa nukurí Marijjai, nuyá chíkich nuwajaisha tuke iruniarmiayi, Yus áujstai tusar. ¹⁵ Nuí siántu painti (120) aents iruntrarmia nuí Pítiur chichastaj tusa wajakmiayi.

¹⁶ Pítiur juna tímiayi “Yatsurtírmesha, umarutírmesha antuktaram. Yuska yaunchu ni Papiriin Jutasnan áamtikramiayi. Jútas akiintsain Tawitkia, Yusa Wakanj jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi. ¹⁷ Nú Jutaska ii írutramuitiat, ii takaamurin páchitkiaiat, ¹⁸ tunáa tura nujai kuítian achik nunkan sumakmiayi. Tura piniakum iniaañ tantane páttimiayi. ¹⁹ Tuma asamtai ashí Jerusarénum pujuarmia nu, nuna nekaawar nú nunkan “Numpa Nunka” anaikiarmiayi. ²⁰ Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanka penké pujuschartí.” Tura

“Ni takatrj chíkich atankiti.”

Tu aarmaiti’ tímiayi.

²¹ “Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus ijjai pujumia nuí tuke Nin nemarsamia nu atí. ²² Juan Jesusan imiaimiania nú tsawantnumiá jukí, Jesus

nayaimpiniam wémiania nú tsawantan tímianu ejé tuke Niijjai wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmiarj etserkamí tusar túramí” tímiayi Pítiur.

²³ Tura nuyá jimiará shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naarj Parsapas, tura apach náarinkia Justu, nunasha anaikiarmiayi.

²⁴⁻²⁵ Tura nuyá Yus-shuar Yúsan áujainiak juna tiarmiayi “Ii Uuntri, Amesha ashí shuara enentáinékame. Jui awai jimiará áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatrij achikiat tusam, ¿tuá achikium, Uunta? Paant iniakmasta.” Tu aujsarmiayi.

²⁶ Tura Israer-shuara túrutairj núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakaní taramiania nu

¹ Pintikiustís náartin jísat jeamtai, chikichik jeanman nuin Yus-shuar tjakarmiayi. ² Tumai aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi. ³ Tura nuj pujuiniaj ji waja kea áaniun wáinkarmiayi. Túruna ankant ankant puunak tarurarmiayi. ⁴ Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairj

súsarmiayi. Tuma asamtai nujai niisha chíkich chichaman chichasarmiayi.

⁵ Nuj Jerusarénum Yus táman umirin Israeraents ármiai. Ashí nunkanmaya Jerusarénum taar matsarmiai. ⁶ Tura túrunamia nuna antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi. ⁷ Nekaachar ashamkarmiayi. “Warinkit, tunaim ajarmai. Ju aents chíkich chíkich chichaman chichainia nu, ashí Kariréanmayanchukait, tiarmiayi. ⁸ Tura iisha ankant ankant ii chichameñka ántatsjik. Ausha urukainiakua, nunak chichainiawa, tiarmiayi. ⁹ Jui ashí nunkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunkanmayasha, ¹⁰ Príjianmayasha, Pampirianmayasha, Ejiptunmaya tura Áprikianmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar jui matsatainiawai. Chikichcha tuke Israershuar ániawai. Tura chikichcha Israershuar ajastaj tusa Israer túrutairin mash túruiniawai. ¹¹ Kritianmayasha Arapianmaya pujuinijai. Tura ashí mash ii chichamejaisha Yusa péñker túramuri ántaji” tiarmiayi.

¹² Ashí aents nuna nékachu ásar ashamkarmiayi. Tura nuámtak aniniaisarmiayi “¿Warinminiait ju?”

¹³ Tura chikichcha wishikiarmiayi. “Nampeku ániatsuash” tiarmiayi.

Pítiur ujakmia nu

14 Nuinkia Pítur, chíkich áuntse Jesusa akatramurijiai wajaki, kakantar chichasmiayi. Chichaak tímiayi “Jutíanmaya shuartiram, Jerusarénumiatirmesha antuktaram. Wi títiatjana nu antukrum pénger enentáimpratarum.

15 Ju áishman, nampekarai, tárumna nu, nampekcharai. Warí, nantu imiá ishichik takuni. ¿Aisha itiurak? 16 Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

17 Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariatatui. Tura nátsaka ímiarartatui. Tura uuntka mesekramiartatui. 18 Tura áishmansha nuwasha winia takartin ainia núnaka winia Wakantrun akuptukartatjai.

Túram niisha Wíi túramun áujmariatatui.

19 Yakí nayaimpiniam, aents túrachminian iniakmastatjai. Tura nunkanmasha

winia kakarmarun iniakmastaj tusan numpancha, jiniasha, mukuintiuncha yuranmia áintsan akupkattajai. 20 Tura tsawái nantusha kajinkiattawai. Tura

nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas

uunt átatui. 21 Nuinkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítur.

22 Tuke chichaak: ‘Israernumiá shuartiram, wi

títijatjana nu antuktarum. Nasarénumiã Jesusnan tajai. Nú Jesusan Yus shiir enentáimtaiwai. Yuska, átum ti enentáimprarum ni kakarmariñ paant nekaatarum tusa, nú Jesusan ti ikiakármiayi. Tura Jesusjãi aentsti túrachminian Yuska túramiayi, átum íimmianum. Nuka ti paant nékarme, tímiayi. ²³ Tura Jesus surunkamia nuna Yuska yaunchu, túruntsãin, paant nekaamiayi. Túrasha Yus enentáimmia nujãi métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. ²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtai. ²⁵ Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamu áchattajai.

²⁶ Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschattame. Wi ame Uchirmetjai, Tunaarincha. Túmaitkui anentu asam ayashur káurtin tsankatrukchattame.

²⁸ Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit' tímiayi.

²⁹ Pítiur tuke chichaak: 'Páantchakait. Ii uuntri Tawit yaunchu jákai. Tura iwiarsamuiti. Ni iwiarsamuri iini pujatsuk. ³⁰ Túrasha Tawitkia Yúsnan etserniuyayi. Tuma asa Yus tímia nuna

nekaamiayi. Yus Tawitian chicharuk tímiayi “Ame akupniuitme. Nekas tájame, ukunam ame iniañnamurminian Kristu akiiniattawai. Niisha Akupin anainiaktatui, amea áintsan.” Nuna Yus táman Tawit nekaamiayi. ³¹ Neka asa, túruntsain Tawit, wainkia nútiksā, Kristu nantaktinrin áarmiyai. Kristu túrunatniurin chicharuk tímiayi “ni wakanincha jákatniunam ikiukchatniuyi. Ayashincha káurtinian tsankatkashtiniuyi.” ³² Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji. ³³ Yuska, Jesus nankaamantuiti tusa ni untsuurinī apujsaiti. Tura ni Wakanin Jesusan súsaiti, Nii yaunchu tímia nútiksā. Tuma asantai jusha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wákachmiayi. Tura nú Tawitiak juna áarmiyai:

“Uunt Yus winia Úntrun tímiayi “akupin pujutainium, winia untsuurinī pujustá.

³⁵ Ame nemasrumin nupetkattajai. Nu túruntsain jui pujustá’ tímiayi.”

Nuní áarmaiti Jesusnan, tímiayi. ³⁶ Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrusha Jesussha in uwemtikkiartin Krístuiti. Ashí áentstíram nu péñker nekaatarum” tímiayi Pítuir.

³⁷ Nuna antukar wake mesekarmiyai. Tura Pitruncha chikich akatramuncha aniasarmiyai “Yatsuru, ¿nuñkia itiurkatjik?” tiarmiayi. ³⁸ Tutai Pítrusha chichaak “Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukrístu naari pachisrum imiantiarum. Nuñkia atumí tunaarin Yus

tsan̄kurtamprattarme. Túrunawakrumin Yuska ni Wakan̄in suramsattarme, tímiayi. ³⁹ Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusr̄i áentsun untsuktaj tusa wakerana nuna tawai” tímiayi.

⁴⁰ Nú chichamjaj̄i tura nuyasha Pítur tuke jintintuuk tímiayi “Yajauch shuara asutiátniur̄i áatna nuyá uwempratarum” tímiayi. ⁴¹ Tuma asamtai nuna antukarmia nuka imianiarmiayi. Nú tsawantaj̄i menaintiú mir (3000) aents Yus-shuar ajasarmiayi. ⁴² Ashí nu shuar Jesusa akatramur̄i jintintiarmia nuna tímiatrusan̄ antukarmiayi. Tura irunar shiir enentáimtunaisar yurumin ármiai. Túrawar, Kristu enentáimtustin namper̄in najanin ármiai. Túrawar Yúsan áujiarmiayi.

Yus-shuar pampararmiania nu

⁴³ Tura Yuska aentsti túrachminian Jesusa akatramur̄ij̄ij̄i túramiayi ni kakarmarin̄ iniakmstaj tusa. Tuma asamtai ashí aents nuna wáinkiar ashankarmiayi. ⁴⁴ Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nun̄ken surukar, ni takakmarin̄cha surukar, atsumainia nuna súarmiayi. ⁴⁶ Tuke tsawantak Yusa Uunt J̄ēen káuniarmiayi. Tura ni j̄ēencha iruntrar warainiak Kristu enentáimtustin námper najanin ármiai. Tura nan̄kaamantu enentáimtumatsuk, yurumkan ajamnainiarmiayi. ⁴⁷ Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant

shuaran uwemtikiar Yus-shuar írunmanum íkiaunki wémiayi.

3

Wekaicha wekasamiania nu

¹ Chíkich tsawantai, nantu nunkaach ajasmatai, Pítiur Juanjai, Yusa Uunt Jeen Yus áusatai tusar wearmiayi, Israer-shuar tuke turin armia nútiksaran. ² Tura áishman, ni akiiniamurinia wekaicha amia nu, nuji aa wáitiniam tuke tsawant pujumiayi. Nu áishmannnasha ni shuari entsakí júkiar nú wáitiniam apujin ármiayi, nuji shuar wayan kuítian seat tusar. Nú wáitisha, Shiir Waiti, tutaiyayi. ³ Tura nú shutuapsha Pitrun Juanjai wayan wáinkiamiayi. Wáiniak kuítian seamiayi. ⁴ Tura Pítiur Juanjai apajas ísarmiayi. Tura nú áishmannnasha chicharuk “íirsata” tímiayi. ⁵ Aishmansha, surustatuapi, tu enentáimias, íimsamiayi. ⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuítjai nankaamas takakjana nuna amastajai. Wats, Nasarétnumia Jesukrístu kakarmarijiai wajakim wekasata” tímiayi.

⁷ Tinia iniais, Pítiur ni untsuuriní achik awajkimiayi. Túram ni nawesha, wanusesha kakaram ajasmiayi. ⁸ Tura niisha wajaki nantent ajakmiayi. Nuyasha wekasamiayi. Tura Pítrujaisha Juánjaisha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi. ⁹ Ashí aents pujuarmia nu, nin wekaan wáinkiarmiayi. Tura ni chichamen anturkarmiayi. ¹⁰ Tura chichainiak “Nuik Yusa Uunt Jeen wáitirin, Shiir Waiti tutainium, nu

áishman̄ tuke pujuuya núchakait” tiarmiayi. Tura ni túrunamuriñ nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka péñker ajasu asa Pítrujai Juánjaisha penké tsurachmiayi. Tura aents nuí pujuarmia nu, warinkit tusar, jeáshkiri tsékenki wearmiayi. Nuka Sarumúnna tiniu áirmiayi.

¹² Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá írum? tiarmiayi. ¿Iisha péñker asariki tsuarmaji? ¿Ii kakarmarjijaiñkiki ewekamsamaji?

¹³ Atsá. Antsu Yuska ni Ūchiriñ Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitían Piratuí surukmarme. Tura Piratu akupkataj tau atumsha suritkiamarme. ¹⁴ Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. ¹⁵ Túrarum iwiaaku átinian Amaana nu maamarme. Tuma aiñ Yuska Nin jakamunmaya iniantkimiayi. Nuka iisha neka asar étsereaji. ¹⁶ Tura ju aishman̄ juí wajaana ju tura nékarmena ju, Yusa Uchiri naari enentáimta asa kakaram ajasuiti. Jesus enentáimtususu asa nekas péñker ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úuntriñjai Jesusan túramarmena nu nékatsuk túramarme. ¹⁸ Tura nu túramurmijai Yus yaunchu tímia nu tímianak umikiurme. Ni Krísturi

wáitsatniuya nuna Yuska ashí ni etserniurin áamtikramiayi. ¹⁹⁻²⁰ Wats, yamaikia tunaaruminia kanaktiarum. Túrarum Yúsnumaani ayantártarum, tunaarun asakárat tusarum. Túrunawakrumniñkia, atumin uwentikramprarat tusa Yus yaunchu anaikiamia nuna akupturmaktatrome. Nusha Jesukristuiti. Tura Niijiai enentáimin ayampratin átatui. ²¹ Tura yamaikia Jesukrístu nayaimpiniam pujustiniaiti, ashí iwiarnatsain. Yuska ukunam ataksha nunkan shiir awajsattawai. Nuna ni etserniurin tsáapin enentái takaku armia nuna yaunchu áamtikramiayi. ²² Tuma asa Muisais ii aparin tímiayi:

“Atumi Uunt Yusri ukunam etserniun akupturmaktatrome, winia akuptukmia núnisan. Nuámtaktirminia achik akupturmaktatrome. Tura nii títiatna nu umirkatarum” tímiayi. ²³ Nánkas aents nu etserniun chichamen umíachkunka emesnartatui. Tura Israer-shuarum páchitkia áchattawai.

Núnisan áarmiayi Muisaissha’ tímiayi.

²⁴ Pítiur tuke chichaak ‘íimiata, Yúsnan etserin Samuer ju tsawantin túratniuri etserkamiayi. Nuyá ashí Yúsnan etserniusha tuke nuna etseriarmiayi. ²⁵ Etseriarmia nuka atumin túramprume. Tuma asa átum pénker pujustinian Yuska ii uuntri Apraáman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úuntrin tímia núnaka incha túramji, tímiayi. ²⁶ Iimiata, Yus ni Uchirin iniantkimia nui, atumin

emka akupturmakmiarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítur.

4

Pitruncha Juánnasha kajerkarmiania nu

1-2 Pítrusha Juanjái Yusa chichamen áentsun jintintiainiak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniaí Israer-patri táarmiayi. Tura Yusa Uunt Jeen wainniu úuntrisha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiarí chichaman jintintinia asamtai. ³ Yamaikia kíawai, kashin iismí tusar achik sepunam enkea iniaisarmiayi. ⁴ Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents ármiayi.

⁵ Kashin tsawarmatai Israer-shuara akupniurí, ni úuntrisha, tura ni jintinniurisha Jerusarénum iruntrarmiayi. ⁶ Nuisha Anassa, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitíantri shuarisha tímian iruntrarmiayi. ⁷ Iruntrar Pitruncha Juánnasha utitiarum tusar akupkarmiayi. Tura itiar matai, ajapén awajsarmiayi. Tura aniasarmiayi “Kame ¿yana kakarmarijjái, yana chichamejai túrarum?” tiarmiayi. ⁸ Tutai nuyá Pítur, ni enentáin Yusa

Wakaní pimiutkamu asa tímiayi “Akupniutiram, tura úuntirmesha antuktarum. ⁹ Ju áishman nuik shutuap amia nu pé_nker ajasmari anintrarme. Kame itiurak pé_nker ajasuit tátsurmek. ¹⁰ Urukamtia úuktataj. Anintrakrumin iisha paant títiatji, Israernumia shuar ashí nekaawarat tusar. Ju áishman Jesukrístu kakarmarijiaj pé_nker ajasuiti. Nasarénumia Jesukrístun, átum máamurmena nuna, tura Yus jakamunmaya iniantkimiania nuna tajai, tímiayi. ¹¹ Nú Jesuska kayaa áintsan_kete. Atumsha jeamniutiram, nú kaya yajauchiiti, tímiarme Jesusna. Túrasha túramaitiatan Niisha jeanam emka apujsamua núnisan_n ajasuiti, tímiayi. ¹² Tura chíkichjaj uwempratin penké atsawai. Ju nun_nkanam ii chikicha naari pachisar uwempratin atsaji. Jesuskete ii uwemtikrampratniun Yus suramsamij nu” tímiayi Pítiur.

¹³ Pítrusha Juansha nánkamas shuara áintsan ármiai. Núkap unuimiarcharu ármiai. Tura unuimiarchaitiat, arantutsuk etseriarmiayi. Aentsu uuntri núnaka nekaawar “Nékachuitiat, itiura sapijmiatskesha chichainia” tiarmiayi. Tura, jusha Jesusa nemarkin ármia núiti tiar nekaawarmiayi. ¹⁴ Nuyasha áishman pé_nker ajasmia nu niijjaj nuj wajamiayi. Tuma asamtai, niisha aj_i wajakui, Israer-shuara úuntri_nkia, pé_nker ajaschaiti títai tukamá tujinkiarmiayi. ¹⁵ Tuma ásar, iik nuamtak áujmatsatai tusar, Pítrusha Juansha shutuapsha a_a awemartai, tiarmiayi. ¹⁶ Tura áujmataniak tiarmiayi “Ju Pítrusha ju Juansha itiurkatjik. Ju uunt túrunamun Jerusarénum matsatainia nu

ashí nékainiatsuk. Wáitaiiti titin tujintiaji, tiarmi-
ayi. ¹⁷ Tura, ashí aents nekaawarain tusar yamaik
jiaktai. “Ju Jesusa naari pachisrum penké jintinti-
awarairap,” titiai” tiarmiayi.

¹⁸ Tura árusan Pitruncha Juánnasha
shutuapnasha ataksha untsukarmiayi. Tura
chicharkarmiayi. “Jesusa naari penké
áujmatsairap. Tura Jesusa túramuri penké
jintintiairap” tiarmiayi. ¹⁹ Tutai Pítiur Juanjai
áimkiarmiayi “Enentáimpratarum. ¿Yus warinia
wakera? ¿Ilikia Yus umirtsuk atumí chichamen
umirkatniukaitiaji? tiarmiayi. ²⁰ Nekaatarum.
Iisha íisjinia nu, tura antukjinia nusha ii etsertsuk
pujustin tujintiaji.” Tu áimkiarmiayi.

²¹⁻²² Shutuáp péñker ajasmia nu kuarenta (40)
uwí nankaamas takakuyayi. Ni péñker ajasmarin
aents nekaawar, “juka aentsti túrachminiaitji”
tusar Yusa naarin uunt awajsarmiayi. Tuma
asantai aentsu uuntri Pitruncha, Juánnasha
asutiátai tukamá aentsun ashamainiak áyatik
chicharkar iniaisarmiayi.

Yus-shuar Yusa kakarmarin seawarmiania nu

²³ Pítiur Juanjai ankant ajarar ni írutramuriin
waketkiarmiayi. Tura jeawar Israer-patri
uuntri tura aentsu úntrisha nin tiarmia nuna
mash etserkarmiayi. ²⁴ Nu ujakam antukar
métekrak Yusan áujuk tiarmiayi “Winia Uunt Yusu,
Amesha nayaimpisha nunkasha najanaitme.
Nayaantsasha tura juí írunna nusha najanamiamé,
tiarmiayi. ²⁵ Tura Tawit ámin umirtamin amia nu
ju áamtikramiamé:

“¿Urukamtai ashí nunkanmaya aents charaatum ajainia? ¿Tura Israer-shuarsha urukamtai ántar chichaman enentáimiainia?

²⁶ Uunt kapitián ármia nuka chichaman jurusarmi-ayi Uunt Yúsan.

Tura pepru úuntriṣha iruntrar Uunt Yúsan kajerkarmiayi. Ni anaikiamurin Krístun nútiksan kajerkarmiayi.”

²⁷ Tu áarmaiti, Uunta, tura nekasaiti. Erutis apachi kapitiántri Punsiu Piratujai jú péprunam iruntrarmiayi. Niisha yajaya shuarjai tura Israernumiá shuaraim nuim iruntrarmiayi. Ame Uchirmin Jesusan tunaarinchan kajerkarmiayi. Jesuska Ame anaikiamiamame, winia takatrun túrat tusam. ²⁸ Tura ame enentáimjai iwiamamna nu uminkiatniuiti. Tura apachcha Jesusan kajerainia ásar, Ame iwiamamna tímianak umikiarmiayi. ²⁹ Uunta, iisia kajertamainiaj nu.

Jes, Áminiu asakrin áujmatramtsujik. Túmaitkuisha ame chichamem ii ashamtsuk etserkatin ame kakarmaram amasta. ³⁰ Tura ame kakarmarmijiai jaasha tsuártin amasta. Ame Uchiram Jesus tunaarincha nujai ii aentsti túrachmin túratniusha amasta. Aents Yusa kakarmarin nekaawarat tusam túrata” tiarmiayi.

³¹ Tura Yúsan tú áujas umikmatai nuin irunar pujuiniain úurkamiayi. Túrunamtai ashí shuara enentáin Yusa Wakaní pimiutkarmiayi. Túmaitkiui ashamtsuk Yusa chichamen etserkarmiayi.

Wíniakete, tícharmiania nu

³² Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku

armia nuna, aya wíniakete tútsuk, jusha ashí iiniu ainiawai, tiarmiayi.

³³ Tura Jesusa akatramurisha, Yus ti yayamu ásar, Yusa kakarmaríjiai Uunt Jesusa nantakmiarín tuke etseras pujuarmiayi. ³⁴ Tura ashí Yus-shuarka nunkan takakusha jean takaku armia nusha, núnaka surukar kuítian itiarmiayi. ³⁵ Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. ³⁶ Chikichík shuar, ni naari Jusé, nunkan takakuyayi. Jesusa akatramurisha Jusen chíkich náarín apujtusarmiayi, Pirnapín. Nu náarisha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamurí núnkenka Chípriiyayi. ³⁷ Niisha ni nunken surukmiayi. Tura nu kuítian itia Jesusa akatramurín súarmiayi.

5

Ananías tunaari

¹ Tura chíkich áishman, ni naari Ananías, ni nuwe Sapirjai ni nunken surukarmiayi. ² Niisha nunkan suruk kuítian emeenak akanak jukí Jesusa akatramurín werí takamtsukea nútikias susamiayi. Ni nuweshá, Sapir, nuna túran nekaamiayi. ³ Túramtai Pítiur chichaak “Ananías, ¿urukamtai uunt iwianch enentáimin enkemturmatai, Yusa Wakanín anañkataj tusam nunka surukam kuit achikiumna nu akankam ikiurmasam? tímiayi. ⁴ Entá, nuínkia nunka áminiuchukait. Surukumna nu kuitcha áminiuchukait. Nusha, ¿urukataj

tusamea tu enentaímpram? Amesha aya áentsnum wáitruachume. Antsu Yusnumsha wáitruame” tímiayi Pítiur. ⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. ⁶ Nú turunamtai áishman̄ tariar Ananías jakan penuararmiayi. Túrawar iwiarsatai tusar júkiarmiayi.

⁷ Tura Ananíasa nuwē arur, menaintiú ura nan̄kaamasaj̄ támiayi. Túrasha ni áishrī jakanka nekaachmiayi. ⁸ Támatai Pítiur nuwan̄ tímiayi “Turuttia. Átum nun̄ka surukurmena nū, ¿kuit itiarumna núnikik surukuram?” tímiayi. Tutai nuwā tímiayi “Ee, núnik surukji.” ⁹ Tutai Pítiur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwiarsatai tusar júkaria nu wininiawai. Tura yamaikia amincha juramkiartatui” tímiayi. ¹⁰ Tutai nu chichamaik ni-isha imia Pitru wajamunam jaka iniaantmiayi. Aishman̄ wayaj̄ tukamá jaka tepan wáinkiararmiayi. Túramtai júkiar ni áishrinin̄ ayamach iwiarsarmiayi. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmiayi.

Yusa kakarmarjijai túrawarmiania nu

¹²⁻¹⁴ Tura ashí Yus-shuar Yusa Uunt Jeen shikirijn̄ irunin̄ áirmiayi. Nu shikirisha, Sarumúnna, tu anaikiamuiti. Tura chíkichmamtinkia nuim iruntratniun̄ asharmiayi. Túmainiayatan̄, ti péñker áiniawai, tu wearmiayi. Tura Yus-shuar Yusa kakarmarin̄ iniakmasarmiayi. Túra asamtai imiá untsurí

aents Yus-shuar ajasarmiayi. ¹⁵ Tura chíkich aents ni shuari jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakaninsha enkemprutmawainti tusar nu shuar túrawarmiayi. ¹⁶ Núnisan arantiá shuarsha ti untsurí ni shuari jáinian tura iwianchrukuncha nu Jerusarénum itiarmai. Tura ashí nu táaruka tsuámararmiayi.

¹⁷ Israer-patri uuntri, tura Satuséu aencha ni-ijjai pujuarmia nu suiir iiniak ¹⁸ Jesusa akatramurín achikiar enkeawarmiayi. ¹⁹ Túrasha kashi Uunt Yusa suntari nayaimpinmaya tara sepú wáitirín uraimiayi. Tura Jesusa akatramurín aa jíikiarmiayi. ²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiai Israer-patri uuntri, tura niijjai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurí sepunmaya itiatarum tusar.

²² Tura suntarsha sepunam jeariar Jesusa akatramurín wáinkiacharmiai. Atsawai tukam táarmiayi. ²³ Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaji tukamar atsá wáinkiaji” tiarmiayi.

²⁴ Israer-patri uuntri, tura Yusa Uunt Jeen wainniu úntrisha, nu chichaman antukar, “tsej ausha çurutiak nunasha iniaisarat?” tiarmiayi. ²⁵ Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

²⁶ Túrunamtai Yusa Uunt Jeen wainniu uuntri ni suntarjijai wear achik itiarimiayi. Túrasha penké aents kayajai tukurmarajj tusar, yajauch awajtsuk itiarimiayi. ²⁷ Tura achik itiaar Israer-shuar naamka pujamunam naka awajsarmiayi. ²⁸ Tura Israer-patri uuntri tímiayi “Iisha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasha, çantukurmek? Atsá. Mash Jerusarénnum átum etserkamu pampankai. Jes, átum, Jesusan máawarai, in tátsumek. Nusha in makuutai tusarum tárume” tiarmiayi.

²⁹ Nuyá tutai Pítiur chíkich Jesusa akatramurijjai chichainiak “Iikia aentsjainkia iniankasar Yus emka umirkatniuitji, tiarmiayi. ³⁰ Jesus atumek krúsnum máamurmena nuna ii iwiaaku Yusri Nin iniantkimiayi. ³¹ Yus ni kakarmarijjai Nin nankaamantu awajsamiayi. Tura nekas Akupniuiti tusa ni untsuurini apujamiayi. Tura áentsun Uwemtikniuiti. Israer-shuar enentái yapajíáwar tunaariniá uwemprarat tusa Yus túraiti. ³² Nu tuma asamtai iisha nu nekaar étseraeji. Tura Yusa Wakanísha nuna étseraeawai. Túrasha aya Yusa umirkarua nunak ni Wakanín súsaruiti” tímiayi Pítiur.

³³ Tutai nuna antukar ti kajerarmiayi. Túrawar, maatai tusar wakeriarmiayi. ³⁴ Tura

nui Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Ju áishman̄ aa ishichik wajasarti” tímiayi. ³⁵ Nuyásha irunar matsamarmia nuna chicharuk “Israer shuartiram, ju áishman̄ tú túratai tu enentáimsarumna nu aneartarum. ³⁶ Enentáimsatarum. Nuik áishman̄ Tiútas wantinkiachmakia. Niisha kapitániitjai takui, kuatru siántu (400) shuar nemarkarmiayi. Tura ukunam nin maawarmatai, ni némarkamurisha pisararmiayi. Túrunawar nuní amuukamiayi. ³⁷ Ukunmasha, iruntrar nekapmartin tsawantincha Kariréanmaya Jútas wantinkiachmaka. Tura nincha nútiksan̄ ti untsurí nemarkarmiayi. Túman máawarmiai. Nu túrunamtai nútiksan̄ ni némarkamurisha pisararmiayi. ³⁸ Jes, tuma asantai nu áishman̄ aa wajainia nu iniaisatarum. Auka pachisairap. Au tumainia nu aya áentsnaketkuinkia amuukattawai. ³⁹ Tura antsu Yúsnaikkuinkia atumsha amuktai tukamarum tujinkiatarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

⁴⁰ Tú tutai tímianak umikiarmiayi. Túrasha Jesusa akatramurin untsukar asutiáwarmiai. Tura chicharuk “Jesusa naari pachisrum penké ishichkisha etserkairap” tiarmiayi. Tú tiar akupkarmiayi. ⁴¹ Jesusa akatramurisha Israer-shuara uuntri pujamunmaya jinkiararmiayi. Tura wáitsamniaitrume tusa Yuska Jesusa naari pachia asakrin ii natsantin wáitsatniun

tsaṅkatramkaitji tusar ti shiir enentáimsar wearmiayi. ⁴² Tura Jesukrístunun áujmatsatniun penké iniaisacharmiayi. Antsu tuke tsawant Yusa Uunt Jēencha tura chíkich jēanmasha páchitsuk etseriarmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawenkar ármiayi. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nuḡ atumí waje ti nukap súarme. Tura íniuka ishichik súarme” tiarmiayi. ² Túruinia Jesusa tuse akatramurḡ ashí Yus-shuaran irurar tiarmiayi “Iisha Yus-Chicham etserkatin iniaisar yurumak súsachminiaitji. ³ Tuma asamtai yatsurtiram, atumḡiniḡ siati áishmanḡ eáktárum yurumkan súsarat tusarum. Pénker wekainia nu, tura neka shuar, Yusa Wakaní pimiutkamu ainia nu achiktaram. ⁴ Iikia antsu Yus áujkir unuiniakratkir Yusa chichameḡ etserkir wétatji” tiarmiayi. ⁵ Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yúsan tuke enentáimtiniuyayi. Tura Yusa Wakanísha pimiutkamuyayi. Chíkich áishmanḡkan anaikiarmiayi, niisha Jiripi, tura nuyá Purukuru, Nikianúrsha, nuyá Temuḡ, Parmenassha, Nikiurássha. Nikiurássha Antiukía nunḡkanmayaitiat Israernancha ashí umirniuyayi.

⁶ Tura nu siati áishmaṅkan Jesusa akatramurin itiararmiayi. Táarmatai, akatramusha, Yus áujtumar, anaikiaji tusar múuknumsha ni uwejen awantsarmiayi. ⁷ Túrasha Yusa chichamenka tuke pampanki wémiayi. Nui Jerusarennumsha Yus-shuar ti kawenkarmiayi. Tura imia Israer-patrisha untsurí Yus-Chichaman umiriarmiayi.

Estepaṅkan Israer-shuara uuntriin júkiarmiania nu

⁸ Estepaṅsha Yusa waitnenkartutairi pimiutkamuyayi. Tura Yusa kakarmarisha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarin nekaawarat tusa túramiayi. ⁹ Israer-shuar iruntai jea, ni naari Ankantín, ámiayi. Nuyá áishmaṅsha tura Serini nunkanmayá áishmaṅsha, tura chíkich nunka Arijiantrianmayasha, Serisianmayasha, Ásianmayasha, tímian Estepañjai áujmatsatai tusar káutkarmiayi. ¹⁰ Estepañ Yusa Wakaní nekatairijjai tímianak chicháa asamtai, nu áishmaṅ Estepañjai inkiunaikiar nupetkataj tukamá tujinkiararmiayi. ¹¹ Tuma asamtai suiir enentáimtuiniak chíkich áentsun Estepaṅkan tsanumprurarar tusar eákarmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi. ¹² Penké áentsun, tura uunt ainia nunasha, jintintin ármia nujajisha chichaman júsar yajauch enentáimtikrarmiayi. Tura Estepaṅkan jintiá akirtuawar achikiarmiayi. Túrawar Israer-shuar naamka matsamarmia nui júkiarmiayi. ¹³ Tura wait chichamtinian itiararmiayi. Niisha taar chicharainiak “Yusa Uunt Jeen ti

pénker ana nu, tura Yusa akupkamuríncha ju Estepañ tuke yajauch chicharui, tiarmiayi. ¹⁴ Nú arantcha ju Estepañ tímia nu antukji, tiarmiayi. Estepañ chichaak “Nasarétnumia Jesuska Yusa Uunt Jeen sáaktiatui, tura nuyá Muisais in ikiurtamkimiaj nunasha yapajiáttawai” tímiayi. Nusha Estepañ tímia nu antukji” tiarmiayi. Tura nunasha penké ántar tsanumprurarmiayi.

¹⁵ Nuyasha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuní íran wáinkiarimiayi.

7

Estepañ etserkamiania nu

¹ Tuma wáiniak Israer-patri uuntri Estepañkan aniasmiayi “¿Ju tuinia nu nekaskait?” tímiayi. ² Tutai niisha áimkiamiayi “Winia úuntrutirmesha, yatsurtirmesha anturtuktarum. Ii Waantu Yusri ii úuntriñ Apraáman wantintiukmiayi. Apraámka Misiuputámia-Kartea nunkanam pujai, Aran nunkanam wéatsain, nui wantintiukmiayi. ³ Tura wantintiuk tímiayi “Ame nunkemsha áminiurmesha ikiukim nunka Wi iniaktustatjamena nui wetá” tímiayi Yus. ⁴ Tutai Apraám Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparí jakamtai “Arant wetá” tímiayi Yus. Nuna taku ju nunkan ii pujajnia jui pujsamiayi. ⁵ Túrayat nunkan ishichkisha súdachmiayi ju nunkanam. Antsu “Ukunam amastatjai. Ame jakakmin ame uchirmin susattajai” tímiayi. Tura Apraama uchirí penké

atsan nuní tímiayi Yus. ⁶ Nuyasha Yus tímiayi “Ame uchirmesha írara núnisaraṅ chíkich nunkanam pujusartatui. Nuṣha emetamu itit awajtai pujuartatui. Kuatru siántu (400) uwí, tímianu uwí wáitsartatui, tímiayi. ⁷ Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunkanmaya shiákartatui. Tura Winia enentáimtursartatui jú nunkanam’ tímiayi. ⁸ Yus tuke Apraámnasha chicharuk ‘Yamaikia Wí-shuar asarum tsupirnaktiniaitrome. Tuma asam amesha uchiram áishmanḡkach akiiniamtai, Wi tímiajna núnismek, sirkunsisiúṅ tutai, shunichiri nuape tsupirkata, tímiayi. Tura chícham Wí yamaikia ámiḡjai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirí Isak akiiniamtai, uchu tsawant nanḡkaasmatai, Apraám nin tsupirkamiayi. Tura Isaksha ukunam ni tuse (12) uchirin ii uuntri armia nunasha nútiksaṅ túramiayi. ⁹ Tura niisha ni yachin Jusen suiir íyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi. ¹⁰ Tuma asa, ashí ni itiurchatrinia uwemtikramiayi. Tura waitnenkartutairincha nekatairincha susamiayi. Tuma asamtai Ejiptunam uunt akupin Paraún Ejiptu nunkaa akupniuri ajasat tura ni jeen wáinniuri ajasat tusa anaikiamiayi.”

¹¹ ‘Tímiatam tsuka tura itiurchatcha ámiayi Ejiptu núnkanam. Tura juí Kanaan nunkanmasha núnisaṅ ámiayi. Tuma asamtai ii uuntri yurumkan penḡké wáincharmiayi. ¹² Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiayi.

Wats, ii úuntri_niun ujaajrume. ¹³ Tura ii uuntri_n atak Ejiptunam wéenak Jusesha, wítjai takui ní yachi_n Jusen nekaawarmiayi. Tura Jusé “Yatsur áiniawai” takui Paraun, antuk “au shuarapitia” tímiayi. ¹⁴ Nuyanka Jusé ni yachin_n chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsarmarmiayi. ¹⁵ Nuní tutai Jakupsha ni shuarijia_n Ejiptunam pujustai tusar wearmiayi. Tura ukunam nú nunkanman_n jakamiayi. Tura ni uchirisha_n ii uuntri_n ainia nu, núnisaran_n nú nunkanman_n jákarmiayi. ¹⁶ Tura atak ukunam ni shuari_n Sikiam nunkanam ni ukunchin_n júkiar iwiarsarmiayi. Kame Sikiam nunkanam Apraámka yaunchu játsuk Amura uchirí_n nunken_n sumakmiayi. Túramtai nuj_n iwiarsarmiayi’ tímiayi.

¹⁷ ‘Yus, Apraáman chicharuk “Nekas wi susattajme” tímiania nú tsawant jeatemantai, Ejiptu nunkanam Israer-aents pampanki ti kawenkarmiayi. ¹⁸ Nu tsawantinha Ejiptunam chíkich akupin naamka ámiayi, tura Jusen nekaachmiayi nii. ¹⁹ Nu akupin ii yaunchu úuntrin_n anankawar yajauch awajiararmiayi. “Atumí uchirí kuírchich ana nu ajapa ikiuktiarum” tu wémiayi. Pampankarain_n tusa tímiayi. ²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. ²¹ Tura nuyá ajapa ikiuktin jeantai entsá apujsamiai. Uunt Paraunka nawantri_n Muisaisan wainiak jukimiayi. Achik, ni uchirin_nia tímiatrusan_n júki tsakatmarmiayi. ²² Tuma asa Muisais unuimiátrauyayi ashí Ejiptu

aents nékarmia nuna. Túramurisha chichamesha kakarmauyayi.'

²³ Estepañ tuke étseruk juna tímiayi: 'Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuari asamtai. ²⁴ Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishman kan máamiayi. ²⁵ Wíi turamujai Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha ninikia nekaacharmiayi. ²⁶ Kashin tsawar Muisais ni shuari jímiar maani pujuinian wáinkiamiayi. Tura nawamnaikiarat tusa "¿Urukamtai nuamtak yatsumjaisha yajauch awajniarum?" tímiayi. ²⁷ Tutai emka nankaama nu Muisaisan kárut shitiá "¿Ya amincha ii akuptamin tura ii chichartamin anaitiamkamam? ²⁸ ¿Winiasha maantuátaj tusam wakeramek, yaú Ejiptunmaya áishman máamamna nútiksamkea?" tímiayi. ²⁹ Nuna antuk Muisaiska Matian nunkanam pisar, nú nunkanam kuarenta (40) uwí yajaya áintsan pujumiayi. Nú nunkanam pujus, nuatak, jimiará uchin yajutmarmiayi.'

³⁰ 'Kuarenta uwí nankaamas, nu atsamu nunkanam Senai náinnium tíjiuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. ³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi.

³² Yus tímiayi "Wiitjai Yus. Ame úuntrumí Apráama

Isaka, Jakupa Yúsrintjai” tímiayi. Tutai antuk Muisaiska ti kuraimiayi sapijin. Tura ístinian tujinmiayi. ³³ Nuyá Uunt Yus tímiayi “Úntrun shiir awajsataj tusam, ame sapatrum ukuin̄kiam ikiuktia, wajamna nui Wi pujakuí. ³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura útainia nunasha antukjai. Tuma asamtai uwentikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepañ tuke étseruk: ‘Ju Muisaisan ni shuari “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anaik uwentikrarat tusa awain̄ki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi. ³⁶ Muisaisaiti Israer-aentsun Ejiptunmayan uwentikramia nu. Yusa kakarmar̄in nekaawarat tusa, aentsti túrachminian untsur̄in túramiayi Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. ³⁷ Jú Muisaisak Israer-shuaran chicharuk “Atum̄inīan̄ak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. ³⁸ Jú Muisais Israer-aentsjai atsamunam pujumiayi. Senái nainnium Yusa suntari níjjaisha pujumiayi. Tura Muisaiska ii úntrijjai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiayi.’

³⁹ ‘Túrasha ii yaunchu uuntri Muisaisan umirkatniun nakitiarmiayi. Áaniuk imiá

umirtaint tusar Ejiptunam waketkitniun wakeriarmiayi. ⁴⁰ Túmainiak Muisais Yusjaj chichastajtsa murá wématai nu shuar Muisaisa yachin Arunkan tiarmiayi “Ii yusrj najanató, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi. ⁴¹ Nuyá wáakachia áaniun najanawarmiayi. Túrawar, júiti ii yusrj tusar, kuntinian maantuawarmiayi, nu susatai tusar. Tura ni uwejejaj najanamun ísar ti wararsarmiayi. ⁴² Nuna túruinian wáiniak Yus, iniaisajai taku, niyya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniurj juní áarmiayi:

““Israer-aentsu, kuarenta (40) uwitin atsamunam wekaimiarmena nuí, ¿Winiak kuntin maanturtuamarum? Winia surustai tusarum penké túrachurme, tímiayi Yus. ⁴³ Antsu, Muruk naartin ántar-yusa pujamurj in jukimiarme. Tura chíkich ántar-yussha, ni naari Rempañ, yaa áanin najanarum nusha jukimiarme. Júkin asakrumin atumí nunkeya jukin, tímiai Papirúnia nunkan nankaiki akupkatjarme” tímiayi Yus.”

Nuní áarmaiti’ tímiayi.

⁴⁴ Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánató” tímiayi. Tutai Muisais Yus tímianak umikmiayi. Nu jeañ ii uuntri yaunchu takaku ármiayi. ⁴⁵ Nu jeañ ni uchirj akintkiar akintkiar wearmiayi. Uku-nam, jú nunka achiktin jeamtai, Yuska kapitían Jusuejaj jú nunkanmaya aentsun jiki akupkarmi-

ayi. Tura ii uuntri kapitián Jusuejai winiarmia nu, nu jeancha jú nunkanam itiarmaiya. Tura Tawit uunt akupin náamtsain, ii úuntrisha nu jean takaku ármiai. ⁴⁶ Kame Yus Tawitian yájau enentáimtichmaiya. Tuma asamtai Tawit Yus shiir pujustinian jean jeamtinian seamiai. ⁴⁷ Túrasha antsu Tawitia uchirí Sarumún Yusa jeen jeam-miai. ⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia. ⁴⁹ Juna áarmiai: “Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusarme tarum? tímiayi Uunt Yus.

Tura Wi ayampratniusha, ¿tui aa?

⁵⁰ Wiki winia uwejruiain ashí najanachmakiaj” tímiayi.’

⁵¹ Estepañ tuke étseruk: “Tura átumka Israer-shuirtirmeke atumí enentáijiai tuke umichuitrume. Atumí kuishisha weaktsui tura Yus nékachua núninaitrume. Yusa Wakaníjiaisha tuke nemasnaikiaitrume. Tura atumí yaunchu úuntrijiai métek túrarme’ tímiayi.

⁵² ‘Iisia, atumí úuntrisha Yusa etserniurin tuke kajerin ármiai, tímiayi. Tura nú arant atumí úuntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anañkarum máachmakuram, tímiayi. ⁵³ Tura Yusa suntari nayaimpinmaya Yusa chichamen susamuitiatrum atumsha penké umikcharmé” tímiayi Estepañ.

Estepañka jakamuri

54 Israer-aencha Estepañ tu chichaamu an-tukar imiá kajerkar nain kátetete awajarmi-ayi. 55 Tura Estepañsha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharin, tura Yusa untsuurinini Jesusan wajan wáinkiamiayi. 56 Tumá wáiniak Israer-áentsun tímiayi “Núá íiskua, nayaimp uran-niun wáinjai. Tura Jesusan, Aents Ajasu tu-taiya nuna Yusa untsuurinini wajan wáinjai” tímiayi. 57 Támaitiat niisha kuishin akiriarmiayi, tura achiktai tusar charáa tiar ashí wajatkiarmi-ayi. 58 Túrawar, péprunmayá arant júkiarmiayi. Tura antuk etserkarmia nu pushirin áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepañkan.

59 Tura Estepañka tukamaitiat Yúsan áujsamiayi. Tura áujuk “Uuntru Jesúsá, winia wakantrusha jurutkitia” tímiayi. 60 Tura tikishmar aujuk “Uunta, ju winia túrutainiana ju makuip” tímiayi. Tura nuna ti iniais, jakamiayi.

8

Sauru Yus-shuaran kajerkarmiania nu

1-2 Estepañkan máawarmatai Sauru, péñkeraiti, tímiayi. Tura áishman Yúsan péñker enentáimta armiania nu, Estepañka ayashincha iwiarsarmiayi, tura aneenak ti uutiarmiayi. Tura nú tsawantaj Yus-shuaran Jerusarénum pujuarmia nuna ti kajerkatín nan kamnamiayi. 3 Sáuruka Yus-shuaran kajerak ti pataat wémiayi. Túmak nuí jeá wayá, nuí wayá áishman nasha

nuwancha wáinkiaka japiki jukí sepunam enkeataj tusa túrimiayi. Tumakui Yus-shuar Jerusarénnumiá pisarar Jutía nunkanam, tura Samaria nunkanmasha jeawarmiayi. Jesusa akatramurinka antsu Jerusarénnuman juakarmiayi.

Samaria nunkanam etserkarmiania nu

⁴ Túrasha Jerusarénnumiá aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusarénnumiá we tura chíkich péprunam Samaria núnkanam ámiania nui jeá, chichaak “Yus anaikiamu ana nu Jesu-saiti” tu etsermiayi. ⁶ Túrakui aents iruntrar chikichík enentáijj*ai* Jiripi étsereamun titiú pujusar antukarmiayi. Yusa kakarmarin nekaawarat tusa aentsti túrachminian túrimia nunasha wáiniarmiayi. ⁷ Ti untsuri aents iwianchruku ármia nuna Jiripi nu iwianchin j*ir*ki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsuri emearusha shutuapsha pénker ajasarmiayi. ⁸ Tuma asamtai nú péprunmayanka ashí shuar ti warasar pujuarmiayi.

⁹ Tura nú nunkanam uwishin Semun pujumi-ayi. Nuikkia wi ímianaitj*ai* tusa Samarianmaya aentsun ananniuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semunsha Yusa kakarmar*ijj*ai áitkiawai.”

¹¹ Tura ti untsuri uwí wawekratmar*ijj*ai anankarta asamtai, umirkarmiayi nu aents. ¹² Túrasha Jiripi Yusa akupeamurin, tura Jesukrístununcha shiir chichaman etserkamiyi.

Tura, nuna antukar nuwasha áishmansha umikiar imian wearmiayi. ¹³ Semunsha imia uwishniuitiat Yus-Chichaman enentáimtus imianmiayi. Tura Jiripijiai tsanin wekaimiayi. Yusa kakarmarin shuar nekaawarat tusa Jiripikia aentsti túrachminian túrimiayi. Nuna wáiniak Semun ti enentáimsamiayi.

¹⁴ Tura Jesusa akatramurisha Jerusarennum pujuarmia nui Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juánnasha nekáa ikiuutarum tusa akupkarmiayi. ¹⁵⁻¹⁶ Tura Samarianmaya Yus-shuarsha aya Uunt Jesusa náariin imianarmiayi. Yusa Wakaninkia tárachmiayi. Tuma asamtai Pítrusha Juanjai nui jeawar Samarianmaya Yus-shuara enentáin Yusa Wakaní pimiutkarat tusan Yusan áujtusarmiayi. ¹⁷ Tura áujtua umikiar Pítiur Juanjai ni uwejen nú Yus-shuaran awantsarmiayi. Nuinikia Yusa Wakaní taramiayi.

¹⁸ Jesusa akatramuri uweje awasmanum Yusa Wakaní taramtai, Semunsha nuna wáiniak, kuitjai nu kakarman sumaktaj, tímiayi. ¹⁹ Tura Jesusa akatramurin chicharuk tímiayi “Winiasha kuitjai surustarum nu kakaram. Wisha nútiksanak nánkamas aentsnum winia uwejur awantsam Yusa Wakaní tarurat tusan tajai” tímiayi. ²⁰ Tutai Pítiur tímiayi Semunkan “Ámeke kuítrumjai métek menkakatniuitme. Warí, Yus amaana nu ¿kuitjai sumaktinkiait? ²¹ Yus esetram enentáimtachu asam nu túramu pachistincha penké tujinkiaime, tímiayi. ²² Enentáimprata. Túram Yus seata. Enentáimtamna nuna Yus

tsaṅkurtamprashtimpiash. ²³ Néka^jme, tsa^{an}ke^a áints^{aṅ} yapá enentáimin pimiutramkaiti. Tura tunaarmⁱⁱⁿ jink^{iá}mua nún^{inia}itme” tímiayi.

²⁴ Tutai Semuṅ áimkiamiayi “Uunt Yus aujtursatarum. Túrutrumna nuna túrunaw^{aij} tusan tajai” tímiayi. ²⁵ Nuyasha Jesusa akatramurⁱ Jesusa túramurⁱⁿ nú áentsun ujakarmiayi. Tura wésar Samaria nuṅkanam pepru ámunmaṅka Yus-Chichaman nu^j etserkiar, nu^j etserkiar Jerusaréⁿnum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntarⁱⁿ nayaimpinmayan Jiripincha akuptukmiayi. Niisha chicharuk tímiayi “Wátskea. Juyá jiinkim Jerusaréⁿnumiá jintia Eṅkasa péprunam wea nuni weme, anaraanⁱ wetá. Nú jintiaka atsamu nuṅkanam naṅkaamawai’ tímiayi. ²⁷ Tutai Jiripisha wémiayi. Jintia wesa Itiupianmaya áishmaṅkan wáinkiamiayi. Nú áishmaṅsha Itiupia nuṅka akupniurⁱⁿ, ni naari Kantasen takarniuyayi. Kantaseka núw^{au}yayi. Tura nu áishmaṅ ti neka asa nuna kuítrⁱⁿ írniuyayi. Nú áishmaṅsha Yúsan áujsataj tusa Jerusaréⁿnum wéu wáketmiayi. ²⁸ Karetanam eṅkemar wesa, Yusa etserniurⁱ Isayas aarmia nuna aujki wémiayi. ²⁹ Wats, Jiripi nú jintianam wéakui, Yusa Wakanⁱ nin tímiayi “Nú kareta amayaṅta.” ³⁰ Tura Jiripisha amayaṅ, Yusa etserniurⁱ Isayasa áarmarⁱⁿ áujun antuk, chicharuk “¿Aujeamna nu nékamek?” tímiayi.

³¹ Tutai nú áishmaṅ tímiayi “¿Itiurak nekaataj? ¿Yaki jintintruat?” tímiayi. Tura antsu iij^{ai} wetái tusa, Jiripincha eṅker jukimiayi karetanam.

32 Nu papí áarman áujmia nu júuyayi: “Murikiua áitkiasañ jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi. 33 Nincha iniatsárarmiayi. Túrasha penké chichamnaka tútsuk tsankamakmiayi. Niisha nunkanam iwiaaku pujá maamu asamtai, ¿yaki nuna áujmatkat’?” Nuní aarma ámiayi.

34 Kantase takarniuri Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniuri nínkik túmama? ¿Chikichnash ta?” tímiayi.

35 Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

36 Nuyá entsa ámanum nankaamak áishman Jiripin chicharuk “Juí entsá jeaji. Wikia juí imianchamniakaitiaj” tímiayi.

37 Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. 38 Tura, karetan awajas mai jíinkiar entsá wearmiayi. Nui Jiripikia Kantase takarniurin imiaimiayi.

39 Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniurisha Jiripin wáinkiachmiayi. Túrasha nínkia waras wémiayi. 40 Jiripisha jeachat Asutu péprunam wantinkiamiayi. Tura nuyá jiinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

9

Sauru Jesusan umirkamiayi
(Túramuri 22.6-16; 26.12-18)

¹ Nuna tumai, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi. ² Tura jeari tímiayi “Papí ame naarmijiai áaram surusta. Wi nuna papí jukin timiai Tamasku péprunam jean, Israer-shuar iruntainiam wayattajai. Túran nú papijiai Jesusan umirkaru ainia nuna, nan̄kamsan achikiartatjai. Túran áishmannasha nuwancha achikian jinkian, jui Jerusarénum enkeataj tusan ikiaankattajai” tímiayi. ³ Tura papí susam Sauru jintiá wéai, Tamasku péprunam nuntumsai nuí aya aneachma nayaimpinmaya tsáapin jiiitsumir téntakmiayi nin. ⁴ Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka san̄kanmiak numin iji-uma núnismek” tímiayi.

⁶ Nuyanka Sauru sapijin kuranki tímiayi “Nuinkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

7 Tura Sáurujaj irunar wearmia nu, chichaamun antukarmiayi. Tura áentsnaka penké wáinkiacharmiai. Tuma ásar ti ashamkarmiayi. 8 Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejnum enkekiar júkiarmiayi Tamaskunam. 9 Nui jeá menaintiu tsawant íimtsuk tura yurumtsuk penké úmutsuk pujumiayi.

10 Nui Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.” Tutai “¿Warí wakeram, Uunta?” tímiayi.

11 Nuyá Uunt Jesus tímiayi “Wajakim jintia, Naka tutaiya nui wetá. Nuisha Jutasa jeen jeam, Társunmaya Sáurun eaktaj tusan winijiai, titiá, tímiayi. Niisha Yúsan áujuk pujawai. 12 Tura juna mesekranam ipiatkamjai Sáurun. Aishman wayá ni uwejéjaj ántiawai, ataksha íimit tusa. Nú áishmanka ámetme, Ananías” tímiayi Jesus.

13 Táman antuk Ananías chichaak “Túrasha Uunta, ju áishmanu ame áentsrumin Jerusarennum ti yajauch awajchakait. Ni yajauch túramurin ti untsuri aents ujatainiawai, tímiayi. 14 Tura yamaisha Israer-patri chicharniun papirin takakui. Tura nujaj ame náarmin páchiaj nuna achik jukitiaj tusa tímiajajisha tarutramji” tímiayi Ananías.

15 Tutai Uunt Jesus tímiayi “Áankisha wetá. Ju áishmankan winia etserniur atí tusan achikjai Wi. Niisha Israer-shuarchancha tura kapitiánniasha tura Israer-shuarnasha wínian etserin átatui, tímiayi. 16 Tura Sauru winia náarun páchia asa

ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananíás Sauru puja-munam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantin-tiurmakamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha ímmiayi. Túruna wajaki we imianmiayi. ¹⁹ Nuyasha yurumámiayi. Tura yurumásha kakaram ajasmiayi. Tura Yus-shuarjai Tamaskunam wárumchik tsawant pujus-miayi.

Sáuruka Tamasku péprunam Yus-Chichaman et-serkamiania nu

²⁰ Nuyanka Sauru Israer-shuara iruntairin wayá Jesusa túramurin etserkamiayi. Etseruk tímiayi “Nekasaiti, ju Jesus Yusa Uchirinti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajajsha nuna achik Israer-patri akupniuriin jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Úwemtikniuiti” tu etsermi-ayi. Tura ti paant étserkui, Tamaskunmayá Israer-aents, nekaschaiti titiaj tukamá tujinkiarmiayi.

²³ Tura ukunam, Israer-aents Sáurun maatai tusar chichaman jurusarmiayi. ²⁴ Tura Sáurusha

nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akirtiarmiayi. ²⁵ Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

²⁶ Tura Sauru Jerusarénum jeá Yus-shuarjaj*í* iruntrattsá wakerimiayi túrasha niñkia ashamiarmiayi. Sáurusha nekas Yus-shuar ajaschaiti tusar ashamiarmiayi. ²⁷ Túmainiaj*ín* Pirnapí Jesusa akatramur*í* matsatmanum jukimiayi Sáurun. Tura nu*í* ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarin etserkaiti” tímiayi. ²⁸ Tura Sauru Jerusarénum juákmiayi. Tura Yus-shuarjaj*í* irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramur*ín* etsermiayi. Tura Israer-shuar Kriaku chichaman chichau ármia nu, nu*í* pujuarmiayi. Sáurusha nu shuarjaj*í* áujmatsarmiayi. Túrasha nu shuar Sáurun itiur máatjik tusar chichaman juriarmiayi. ³⁰ Tura Yusaj*í* yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

³¹ Tura Jutíanmaya, Kariréanmayasha, Samarianmayasha Yus-shuar shiir tímiajnisa*n* ajar kakaram ajasarmiayi. Yúsan ashamainia ásar, tura Yusa Wakan*í* yayamu ásar kawen*ki* kawen*ki* wearmiayi.

Pítiur Eneasan yáinmiania nu

³² Tura Pítiur Yusaj yachi armiania nuí iráa wekaimiayi. Wekaak Yus-shuar Rítianam matsamarmia nuísha iraumiayi. ³³ Nuísha Rítianam jeá áishmankan Eneas náartinian wáinkiamiayi. Niísha emearu asa wekaicha uchu uwí aya tépenuyayi. ³⁴ Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. ³⁵ Nuna túman wáinkiar Rítianmaya aents tura Saruñmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

³⁶ Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nuí pujus tuke péñker túriniuyayi. Tura niísha nútiksan yayi wémiayi. ³⁷ Nu tsawantinik Túrkas sunkuran jateemak jakamiayi. Túrunamtai ayashin nijiarar yakí tesaamunam áepsarmiayi. ³⁸ Jupe péprusha Rítianmaya tíjjuuch ámiayi. Júpenmaya Yus-shuar Rítianam Pítiur pujan nekaawar jimiará áishmankan akatrar akupkarmiayi, Júpenam wari winití tusar. ³⁹ Nuí tutai Pítiur niíjjai wémiayi. Tura támatai jaka tepemia nuí awayáwarmiayi. Nuí wayamtai waje pujuarmia nu útkiar Pítrun téntakarmiayi. Túrawar pushirín, Túrkas iwiaaku pujus najankamia nuna iniaktusarmiayi.

⁴⁰ Nuyanka Pítiur aa akupkarmiayi ashí. Tura niísha niñki tikishmar Yúsan áuj samiayi. Nuyasha nuwan jaka tepaan iis tímiayi “Tapitia nantaktia.”

Tutai niisha íimi Pítiur wajaan wáiniak nantaki pujusmiayi. ⁴¹ Tura Pítrusha nuwan uwejnun achik awajkiayi. Tura iniais Yus-shuar ármia nuna tura wajencha untsukar Túrkas iwiaaku aja-sun iniaktusarmiayi. ⁴² Nu túrunamun ashí aents Jupe péprunmaya nekaawarmiayi. Túrawar untsurí aents Uunt Jesusan umirkarmiayi. ⁴³ Tura Pítruka Jupe péprunam untsurí tsawant nuapen-iwiarin Semunka jeen pujusmiayi.

10

Pítiur Kurniriujai

¹ Sesaria péprunam Kurniriu naartin suntara kapitiántri pujumiayi. Ni suntari Itiaria nunkanmaya ármiai. ² Nu kapitián Kurniriu ni shuarijjai, Yuska nankaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksañ kuítniasha takakchan yáintaj tusa Israer-shuaran súuyayi. Tura tuke tsawant Yúsan áujtiniuyayi. ³ Chíkich tsawantaj, nantu aanku ajasaj Kurniriu ímiarmiayi. Yusa suntari Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarin ashamak íimia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai’ tímiayi. ⁵ Tura Yusa suntari Kurniriuun tuke chicharuk “Wats, áminiuram Júpenam akupkata. Semun, chíkich naari Pítiur, tatí tusam akuptukta, tímiayi. ⁶ Nu Semunsha chíkich Semunjai pujawai. Nuka nuapen-iwiarin

Semunkaiti. Tura ni jeesha nayaantsanam ayaa-
mach pujawai, tímiayi. Nui jeawakmin, ame
túratamna nuna Semun Pítiur turamtatui” tinia
ikiukmiayi. ⁷ Tura Yusa suntariŋ waketkimtai,
Kurniriuka ni takarniurŋ jímíaran itiamiayi. Tura
suntaran chikichkiniak nemarsat tusa itiami-
ayi. Nu suntar ni írutramuriyayi. Tura Yúsán
enentáimtiniuyayi. ⁸ Kurniriusha ni túrunamurŋ
ashí ujáa-já awajas Jupe péprunam akupkarmiaiyi.

⁹ Kashin tsawantaj Kurniriu suntariŋ Júpenam
nuntumsaraj, tutupin aj Pítiur jeə yakí wáakunam
Yúsán áujсатаjtsa wakamiayi. ¹⁰ Pítrusha
ti tsukamak yurumátaj tusa wakerimiayi.
Túrasha yurumkan iniarainiaj Pítiur íkiajtiusmak,
¹¹ nayaimp uranmianum wankkaram tarachia
áanin tura nuna tsakarŋ jinkkiakman tárún
wáinkiamiayi. ¹² Nu tarachnium yajasma
irunmiayi. Wekainiusha, nanamtincha, tura
napisha enkkemiarmiayi. ¹³ Tumaj Yus Pitrun
chícharuk “Pitru, wajakim maam yuata” tímiayi.

¹⁴ Tutai Pítiur tímiayi “Atsá Uunta. Ii Israer-
shuartikia yajauch yajasma áinia nu tura yúatin
surimkiamu ana nuka penké yúchaitji. Tuma
asantai júnaka wikia yuashtatjai” tímiayi.

¹⁵ Túrasha Pitrun atak Yus chícharuk “Wi,
penkkeraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha
tarach ataksha nayaimpiniam wakamiayi.
¹⁷ Nuna túrunan wáiniak Pítiur wariniak áaniuncha
wáinkiaj tusa enentáimia pujaj kapitián Kurniriu
ayakma armia nu, anintruiniak jeawariayi.
¹⁸ Tura jeawar kakantar untsummiar “¿Semun,
Pítiur, juŋŋ pujá?” tiarmiayi.

19 Tura Pítruka íimiarmarín tuke enentáimia pu-
jai Yusa Wakaní chichaak “Menaintiu áishman
untsurmainiawai, tímiayi. 20 Wajakim akaikim
arantutsuk au nemariarta, Wi akupkamu asam-
tai” tímiayi.

21 Nuna antuk Pítur taramiayi. Tura áishman kan
Kurniriu akupkama nuna wajainian wáiniak “Wi-
itjai Pítur. Átum eattrumna núitjai. ¿Warí tarin-
trum?” tímiayi.

22 Tutai niisha tiarmiayi “Iisha kapitián
Kurniriu akupkamu taji. Kurniriuka áishman
pénkeraiti. Yúsan enentáimtiniaiti. Tura Israer-
aencha nin shiir enentáimtuiniawai. Níiya
winiaji, tiarmiayi. Kame nuik, Yusa suntari,
nayaimpinmaya akupkamu, ii kapitiántrín tímiayi
“Pítrun untsukát akupkata. Nii tatí. Tura nii
títiatna nu pénger anturkata” tímiayi. Nuna ii
kapitiántrín takui iisha winiji” tiarmiayi.

23 Tutai Pítur jeá awayámiayi. Tura nu kashi nuí
kanararmiayi.

Kashin tsawarar Pítur nijjai wearmiayi.
Túrasha Júpenmaya Yus-shuarsha nin
nemariarmiayi. 24 Nuyá tsawarar Sesaria
péprunam, Kurniriu nákamun jeariarmiayi.
Kurniriuka ni shuarín tura ni nekas amikrín,
nekaatarum tusa untsuk ikiaankamiayi. 25 Tura
Pítrusha jeamtai Kurniriu aa jiintiuki Pítrun
tikishmatramiayi. 26 Túrasha Pítur awajki tímiayi
“Wajaktia. Wisha aya áentsketjai. Ámea núnisketjai”
tímiayi. 27 Tura chichasar jeá wayawarmiayi.
Tura wayá, untsurí aents matsatun wáinkiamiayi.
28 Nuyá Pítur chichaak tímiayi “Amikrúa,

atumsha nékarme. In Israer áentstinkia, chíkich áentsjai pachiniarchatniuitrume, tura ni jeencha wayashtiniaitrume in jintintramin turamainiaji, tímiayi. Túrasha Yuska ni enentáimsamurin wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiayi. ²⁹ Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

³⁰ Tutai Kurniriu tímiayi “Kuatru tsawant nankaamasai tura nantusha juni ai, wikia yurumsuk Yúsan áujsamjai, kiarai áujsatin ana nuna. Túran chichai, áishman, ni entsatairi wincharpatniun, naka wajatran wáinkiamjai, tímiayi. ³¹ Niisha chichartak turutmiayi “Kurniriu, Yus ame áujman anturtamkayi. Tura shuar atsumainia yáinmamna nunasha nekarmayi, turutmiai, tímiayi. ³² Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. ³³ Túrutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha juí Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiayi. ³⁵ Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtawai, tímiayi. ³⁶ Yuska shiir chichaman Israer-aentsun akuptukmiayi. Nui chichaak “shuar Jesukrístu naarin páchiakka, Yusjaj nawamnaikiatin átiniaiti, tímiayi. Nú Jesukristu ashí shuara Úuntrinti’ tímiayi Yus. ³⁷ Túrasha Kariréa nunkanam nankamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nankamamiayi. ³⁸ Tura jusha nékatsrumek, tímiayi. Nasarénumia Jesus, Yus Anaikiamu asa, Yusa Wakaní kakarmarjijai péñker túriniuyayi. Iwianchruku wáitias pujuarmia nuna péñker awajsamiayi. Yus Niin pujurma asa ashí nuna túriniuyayi. ³⁹ Tura Israer-aents matsatkamunam tura imia Jerusaréñ péprunmasha Jesus túramia nu, iisu asar, iisha étseaeji. Tura ayu, Nin achikiar krúsum máacharmakia, tímiayi. ⁴⁰ Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaj, tímiayi. ⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achirmakmiaj nú áentstiniak wantintiurmakmiaji, tímiayi. Au nekas jakamunmaya nantakmiatai iisha Nijijai tsaniñkiar yurumámji, tímiayi. ⁴² Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki

títiniaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi. ⁴³ Ya shuarak Jesusa náarín pachia nú shuarnaka tunaarín tsankurattawai, nuna ashí Yúsnan etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujai, tura chikichcha antúu pujuiniaí Yusa Wakaní tarurarmiayi. ⁴⁵⁻⁴⁶ Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha áinia nunasha tarurcharaik, tu enentáimsarmiayi ⁴⁷ Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi. ⁴⁸ Nuyá Pítiur, Jesukrístu náarín imiantiarum tusa akupkarmiayi. Tura nuyasha Pitrunka, niijjai ishichik tsawant pujustinian seawarmiayi.

11

Ni túrunamurín Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurísha tura Jutíanmayá Yus-shuarsha antukarmiayi.

² Túmainiak Pítiur Jerusarénum jeamtai, Israer-shuar Yus-shuar ármia nu chichainiak

³ “¿Urukamtia Israer-aents áiniachusha iyumam?

¿Tura aujaj tsañkiam urukamtai yurumámum?” tiarmiayi.

⁴ Tutai Pítiur ashí yámankamtaiknumiā túrunamun ujakmiayi. ⁵ Chichaak tímiayi “Wikia Jupe péprunam pujumjai. Tura nuí Yusan auju pujusan ímiarmajai. Tura wañkaram tarachia áanin kuaru tsakarín jinñiakma, nayaimpinmaya táarun wáinkiamjai. Tura wi pujamunam jeartimiaí, tímiayi. ⁶ Tura nuí iyaj tukaman init yajasman, napincha, nanamtinniasha enketainian wáinkiamjai, tímiayi. ⁷ Tura chichaman antukmajai “Pitru wajakim maam yuata” túrutun antukmajai, tímiayi. ⁸ Túrutkui “Atsá, Uunta, áanin wapiknaka, Israer-aents yuatin surimkiamu ana núnaka take yúchaitjai” tímiajai, tímiayi. ⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi. ¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. ¹¹ Nuí túruna pujaj menaintiú áishman Sesarianmaya akupkamu, winia eatainiak wi pujamunam tarutiarmiai, tímiayi. ¹² Tura nuí Yusa Wakaní chichartak “Arantutsuk aujaj wetá” túrutkui, wémajai. Tura ju sais Yus-shuarjai wi wémajai. Túrunar ashinñiar Kurniriu jeen wayamji, tímiayi. ¹³ Niisha chichaak “Jearui Yusa suntari nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun Pítiur tatí tusam áishman akatram akupkata. ¹⁴ Pítrusha taa, itiura amesha tura áminiurmesha tunaarminiā uwemprattam nuna turamtatui.” Yusa suntari nuní turutmiai” tu ujatkamiayi Kurniriu’ tímiayi.

15 ‘Wi chichastasan júaraj, Yusa Wakaní tarurarmiyai, yámankamtaik in tarutrampramiáj nútiksaj, tímiayi. 16 Nuñkia Uunt Jesus timian enentáimpramjai. Niisha tíchamka “Juan entsajaj imiakratmiayi. Tura antsu Yusa Wakanínkia imiantinia áintsaj atumí enentáin enkemprutmattarme.” Nu timian enentáimpramjai, tímiayi. 17 Atumsha enentáimpratarum. Uunt Jesukrístu umirkamíaj nuj, incha Yuska ni Wakanín suramsamíaj. Tura in suramsamíaj núnisaj Yus nincha ni Wakanín súsarimiyai. Nuna tura asamtai, wikia, túrashtiniaiti, Yúsán títinkiaitíaj” tímiayi Pítíur.

18 Tura Pítíur taman antukar mitiat wáinkiar “Nekasaiti, Israer-shuarchancha ni enentáin yapajíawarmatai tuke iwiaaku átinian Yuska nin súsaruiti” tiarmiyai. Tusar Yusa náarín ti shiir awajsarmiyai.

Yus-Shuar Antiukía péprunam wearmiania nu

19 Estepañkan máawarmia nuj, chíkich Yus-shuarnasha maatai tusar pataatiarmiyai. Túram chíkichkia pisarar Pinisia nuñkanam, Chipri nuñkanmasha, tura Antiukía péprunmasha wearmiyai. Tura nuj jeawar Yus-Chichaman chikichnaka ujatsuk aya Israer-aentsnak ujakarmiyai. 20 Tura niijiaj Chipri nuñkanmaya pisararmia nu Serini nuñkanmayasha Yus-shuar ármiayi. Nuka Antiukíanam jeawar Israer-shuarchan Uunt Jesusa túramurín ujakarmiyai. 21 Tura Uunt Jesus ikiakárma ásar, nú nuñkanmaya aents ti untsurí yaunchu túrutairín iniaisar Jesusan enentáimtuiniak Yus-shuar ajasarmiyai.

²² Tura nu chichaman antukar, Jerusarénumia Yus-shuar, ame iyutá tusar, Pirnapín Antiukíanam akupkarmiayi. ²³⁻²⁴ Pirnapísha jeá, Yus nú shuaran uwemtikrarma nuna wáiniak warasmiayi. Pirnapísha péñker áishmankauyayi. Yusa Wakanísha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tuke enentáimjai umirkarum Yus nemarsatarum.” Tu chicharak ikiukmiayi. Tura nuísha nú arant untsurí aents Yusaj kawenkarumiayi.

²⁵ Nuna turasua amik Pirnapí Tarsu péprunam wémiayi Sáurun wáinkiataj tusa. Tura wáiniak Antiukía péprunam jukimiayi. ²⁶ Tura nuí jeawar, nú péprunmaya Yus-shuarjai iruntrar chikichík uwí pujusarmiayi. Yus-Chichaman untsurí shuáran ujaak pujuarmiayi. Tura nuí Antiukía péprunmanka Yus-shuaran émkaka, Kristu shuari, tiarmiayi. ²⁷ Nuyá Yusnan etserin Jerusarénumia táarmiayi Antiukíanam. ²⁸⁻³⁰ Túmainiaj chikichík etserin, ni naari Akaapu, Yus-shuar matsatmanum ajapén wajaki chichasmiayi. Tura Yusa Wakaní nekatairijjai chichaak “Ti tsuka ashí núñkanam átatui” tímiayi. Tuma asamtai Antiukíanmaya Yus-shuar chichainiak “Jutía nunkanmaya Yus-shuar ainia nu yáintai” tiarmiayi. Ankant ankant ni wakeriarmia núnik súsarmiayi. Tura nú kuítniasha Jutíanmaya Yus-shuara úuntrin akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu pujai.

12

Pitrun sepunam enkeawarmiania nu

¹ Nu tsawantaj*̄* akupin Erutis Yus-shuaran máataj tusa chichaman jurus áentsr*̄*in ishiakmiayi. ² Tura Juanka yachin Jakupun suen tsupirkar máawarmiayi. ³ Nuna tura máawarmatai Israer-aents wáinkiar “juka pé*̄*nkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiayi. ⁴ Pítruncha achik itiar*̄*matai, Erutis sepunam enkeata tusa akupkamiayi. Tura sepunam suntarsha an*̄*kant an*̄*kant, kuar*̄*tu kuar*̄*tu, ashikia tiasisáis (16) irunar Pitrun téntakarmiayi. Tura, ju jísat nan*̄*kaasmatai, mantamnatí tusan j*̄*iktia*̄*tjai aents iruntramunam, tu enentáimsamiayi Erutis. ⁵ Túramu asa Pítruka sepunam pujumiayi. Tura suntarsha mijiatrutsuk i*̄*yarmiayi. Túramunak Yus-shuarka, Pitrun yáin*̄*kiat tusar iniaitsuk Yúsan ti áujiarmiayi.

Yusa suntari Pitrun uwemtikramiania nu

⁶ Wats, Erutis, kashin j*̄*iktia*̄*jai takui, nú kashi Pítruka jimiará suntar wajamunam etema tepes kanarmiayi. Tura jimiará jirujai jin*̄*kiamuyayi. Tura chíkich suntarka jinmanum ii wajarmiayi. ⁷ Tumaj aya aneachma Yusa suntari*̄* nayaimpinmaya taa ajapén wajasmiai*̄*. Túrunamtai jeanman*̄*ka tsáapin ajasmiai*̄*. Tura Yusa suntarisha Pitrun páenum antin ishintiarmiayi. Tura jirusha Pitru uwe*̄*jéya sayat atiniamiayi. ⁸ Tura Yusa suntari*̄* tímiayi “Kaki emenmamata. Túram sapatrumsha

aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi. ⁹ Tutai Pítiur nemarsamiayi. Túrasha Pítruka, mesekranmaapi júniaja, tu enentáimsamiayi. ¹⁰ Túrasha emka suntar ímia wajan nan̄kaikiarmiayi. Tura nuyasha chíkich suntar ímia wajan nunasha nan̄kaikiarmiayi. Tura nuyasha jíintiainium jiru waiti ámanum jeawarmatai, nú wáitisha ímia-niñki kuat uranmiayi. Túrunamtai jíinkarmiayi. Tura jintiá ishichik wésan, Yusa suntari Pitrun níiniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntariñ nekas akupturkayi. Erutis mantuataj tusan pujurtana nuyá Yusa suntari winia uwemtikrurai. Tura Israer-aents túrutatajtsa wak-eriarmia nuyasha uwemtikrurai” tímiayi. ¹² Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainaij Pítiur jeamiayi. ¹³ Tura jeá aa wáitin tuntuimiayi, wayataj tusa. Túmakui nuwá uchich, ni naari Rutí, yákit tusa iyumiayi. ¹⁴ Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsumek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

¹⁶ Tu chichainiain Pítruka tuke tuntuí wajamiayi. Tura wáitin uraj tukamá Pitrun wáinkiar

ashamkarmiayi. ¹⁷ Ashamak chichainiakui Pítíur, uweje takuí itiatmamtikiarmiayi. Tura nuyá Uunt Yus sepunmayan uwemtikramun ujakmiayi. Tura “Ju chicham Jakupu tura chíkich Yushuarsha ujaktarum” tímiayi. Nuna t̄i iniais jiinki arant wémiayi.

¹⁸ Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítíur túrunamun nékachu ásar nuna tiarmiayi. ¹⁹⁻²⁰ Túrunamtai Erutis chichaak Pítíur eaktarum tusa akupkarmiayi, túrasha wáinkiacharmiai. Túrunamtai Erutis suntaran untsukar, Pítrun íisarmia nuna aniasarmiayi “¿Pítíur itiura menkakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjaisha nemasnaikiarmiayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tíru péprunam tíjuichiiti. Setúnmaya aents Tirunmaya áentsjai Erutisa nunkeyan yurumkan súmainia ásar, Erutisjai nawamnaikiatniun wakeriarmiayi. Tuma asamtai métekrak enentáimsar, Erutisa takarniuri penkeri, ni naari Parastu, niijjai emka amikmawar nuyá Erutisan weriar shiir matsamsatniun seawarmiayi. ²¹ Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanak áujmatmiayi. ²² Nui pujus chichaakui aents untsumainiak tiarmiayi

“Ju chichaa pujana juka áenchaiti. Antsu nekaska yúsaiti” tiarmiayi. ²³ Tumai nuyai̇k Yusa suntari̇ nayaimpinmayȧ tari̇ Erutisan jaa awajсамиayi. Tuma asamtai̇ nusha aka yuam jakamiayi. Erutissha Yusan waantu awajtsuk niṅki waantu enentáimtuma asa túruna jakamiayi. ²⁴ Túrunamtaisha Yusa chichameṅka nú arant pampaṅki wémiayi. Túmaki̇ ashí núṅkanam anturamiayi.

²⁵ Tura Pirnapísha Sáurusha ni takatṙin amukar Jerusaréṅnumi̇a Antiukíanam waketainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmayȧ Yus-shuarnum Yusnan etserin páchitra ármiayi. Nútikṡn Yus-Chichaman jintiṅniurisha ármiayi. Pirnapísha tura Mukusa Semuṅsha, nuyá chíkich, Serinianmayȧ Rúsiusha tura akupiṅ Erutisa tsakatkesha, ni naari̇ Man-aen, Sáurusha tímianu ármiayi. ² Tura chíkich tsawantai̇ niisha yurumtsuk Yúsan áujeak pujuiniȧi Yusa Wakaní̇ tímiayi “Pirnapísha, Sáurusha akanturkitiarum, tímiayi. Wi takatan súsaiṫjiana nuna takasarat tusarum túratarum” tímiayi. ³ Tutai̇ ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiayi. Túrawar Antiukíanmayȧ akupkarmiayi.

Chipri nuṅkanam jeawarmiayi

⁴ Tura nuyañka Yusa Wakaní̇ akupkam Pirnapísha Sáurusha jíinkiar Serusia péprunam

jeawarmiayi. Tura nuyá uunt kanunam enkemprar Chipri nunkanam jeawarmiayi. ⁵ Juansha yáintaj tusa némarkauyayi. Nui Saraminia péprunam jeawar Israer-shuar iruntai jeanam wayawar Yus-Chichaman etseriarmiayi. ⁶ Tura Chipri nunkanam pepru ainia nui wáirkutak Papus péprunam jeawarmiayi. Nui jeawar Israer-aents uwishin ni naari Parjesúsan wáinkiarmaiya. Ni chíkich náarinkia Erimiasauyayi. Niisha uwishniuitiat, Yúsnan étserējai, tíniuyayi. ⁷ Akupin Serjiu Páurujai pujuyayi. Nu akupniusha ti pénker enentáimniuyayi. Tura Pirnapín Sáuruncha chichaman akuptukmaiya, taarti tusa. Kame Yus-Chichaman antuktaj tusa wakerak untsukmaiya. ⁸ Tura uwishin Erimias nuna nakitiak “Auka pénkerchaiti” tímiayi. Akupniusha Yúsan umirkain tusa nuna tímiayi. ⁹ Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiayi ¹⁰ “Ámeka wáitiatme. Anañkartiniatme. Yajauchiitme. Maaj, iwianchiitme. Tura ashí pénker ana nuka imiá nakitniuitme. Tsej, ¿urukamtaí Yusa jinti naka ana nu emeskim weam? ¹¹ Paij, yamaikia Uunt Yus asutiámattawai. Yamaikia amesha jiji kusurmatai untsurí tsawant tsáapnin penké íischattame” tímiayi. Tura nú chichamaik jii kusurmatai kirit íimiuk chikichan eamiayi enkeki jurukit tusa. ¹² Nu túrunamtaí akupin nuna wáinak, ti enentáimpramiayi. Túruna Uunt Yusa chichamen enentáimtur umikmaiya.

Chíkich Antiukánam etserkarmiania nu

13 Nuyá Juan waketki Jerusarénum wémiayi. Tura antsu Pápruka ni tsaniakmarijjai kanunam enkemprar Pápus péprunka ikiukiar Pirji péprunam jeawarmiayi. Nusha amaini Pampiria nunkanam pujawai. 14 Nuyá Pirji péprun nankaikiar Antiukía péprunam jeawarmiayi. Nú Antiukíasha Pisitia nunkanam pujawai. Nui jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi. 15 Tura nui Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiayi “Yatsuru, jintiatin chicham takakkurmeka yamaik titiarum. Antukarmí” tiarmiayi.

16 Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi. 17 Ii Yusri ii yaunchu uuntrin Israer-shuartin achikmiayi. Tura niisha írara núnik Ejiptunam matsatainijai Yuska nin páchiniak uunt awajsarmiayi. Yus ni kakarmarijjai nú nunkanmaya ii yaunchu uuntrin uwemtikrarmiayi. 18 Túrasha atsamu nunkanam ii uuntrin kuarenta (40) uwitin Yuska aya kátsuntramiayi. 19 Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úuntrin susataj tusa Yus túramiayi. 20 Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsnan etserin náamtsáin nuna túrimiayi Yus. 21 Tura nuyanka

áencha juísan nakitiainiak, uunt akupin náamkat tusar Yúsan seawarmiyai. Tuíniakui Yuska Sesa uchirín Saúran anaikiamiyai. Nú Saúra úuntrinkia Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsankatkamiyai. ²² Tura Saúr náamkan ataksha Yus awainkimiyai. Tura nuyá iiksanñ nú nunkanam uunt akupin atí tusa Tawitian anaikiamiyai. Tura Yuska juna Tawitnian tímiyai “Isaí uchirín Tawitian winia enentáir jeamtai achirmakjai. Tura Winia umirtin átatui” tímiyai. ²³ Wats, Tawit weanmaya Jesusaiti. Tura Yuska Israer-aentsun Uwemtikrartinian Jesusan anaitiukmiyai, yaunchu timiarñ uminkiát tusa. ²⁴ Jesuska táatsainñ Juan ashí Israer-shuaran tunaarñia enentáimtumar imiantinian ujakmiyai. ²⁵ Tura Juanñsha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamuri, Kristu tutai, nákarmena núchaitjai. Antsu Niñkia winia ukunmarui winittiawai. Tura Niisha wíjiañkia ti nankaamantu asamtai wikia sapatrñcha atitrataj tíchamniaitjai” tímiyai.’

²⁶ ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íniuiti, tímiyai. ²⁷ Iis, Jesusa túrunatniurñ Yuska yaunchu ni etserniurñ áamtikrachmakia. Tura ukunam Jerusarñnumiñ shuar ni akupniurñijai tuke sáwartin nuna áujeatskesha penké nekaacharmiyai. Tuma ásar Jesuska Yusa Uchirñti tícharmiyai. Tura, jakatí, tiarmia nuñ, Jesusa túrunatniurñ, Yus yaunchu chichakmia nuna, tímiatrusarñ

umikiarmiayi, tímiayi. ²⁸ Jesuska penké tunaamkachunak yamaikia mantamnatí tusar Piratun seawarmiayi, tímiayi. ²⁹ Tura Yusa Papirjín ashí Jesusnan tímia nuna tímiannak umikiarmiayi. Tura nuyá krúsnumiá itiarar iwiarsarmiayi. ³⁰ Túramunak Yus jakamunmayan iniantkimiayi. ³¹ Jesuska jakamunmayá nantaki, yaunchu Kariréanmayá Jerusarénum Nijjai irutka wéarmia nuna núkap tsawantin pujus wantintiuksiayi. Nú shuaraiti yamaikia Jesusa túrunamurín etserainia nu' tímiayi.

³² 'Iisha núnisrik shiir chichaman Yus yaunchu ii apachrín tiarmia nu étsereaji. ³³ Iisha Israerweeá asakrin, Yuska Jesusan iniantkimia nujai ii apachrín anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme. Túmaitkiui yamaikia winia iwiaakmar susamuitme.”

³⁴ Tura Yuska Jesusa nantakmiarín jintintia, tura ni ayashí káurchatniun jintintia, chíkich Sarmu papinium juna áamtikramiayi:

“Nekas penkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí káurtincha tsankatkashtatme.”

³⁶ 'Nekaatarum, yatsurtiram, Yuska Tawitia ayashín tíchamiayi nuna. Tawitkia Yus tímian amuk jakamiayi. Túrasha ni ayashínkia káurmiayi.

³⁷ Tura antsu Yus iniantkimia nuna ayashínkia penké káurchamiayi. ³⁸ Tuma asantai, yatsurtiram

nekaatarum. Jesusjainkete tunáa asakártin.
³⁹ Tura Muisais yaunchu akupkamia nujai
 tunáa tsankurnarchamnia nu, yamaikia Jesusjai
 tsankurnartiniaiti. ⁴⁰⁻⁴¹ Yúsnan etserin juna
 áarmiayi:

“Enentáimpratarum wishikkiartinti-
 ram. Ashamkatarum. Túrarum
 menkatumpratarum. Wi Yus asan, átum
 pujarmena nu, aents túrachminian túratajna
 nusha penkesh nekaashtatrome, chíkich
 ujatmainiakuisha.” Tu áarmaiti.

Tuma asamtai yatsurtiram, aneartarum atumin
 nuna túrutmawairum, Yusnan etserin aarma tana
 nútiksan.” Nuna chichaak amukmiayi Papru.

⁴² Tura nuyá Papru Pirnapíjjai jiinki wéenakui
 aents chichainiak “Chíkich sáwartincha jútiksarmek
 etserkatarum” tiarmiayi. ⁴³ Tura nuyá iruntsua
 tsenkeenak Israer-shuarsha, tura chíkichkia Is-
 raer ajararusha, Yúsán umirkatajtsa wakeriarmia
 nuka, Páprun Pirnapíncha nemarsarmiayi. Ni-
 isha nu áentsun chicharuk “Yusa anenkraitairi
 enentáimtusrum kakartarum” tiarmiayi.

⁴⁴ Tura chíkich sáwartincha nu péprunmaya
 ti untsurí aents Yus-Chicham antuktai tusar
 tuakarmiayi. ⁴⁵ Tura Israer-shuarka ti untsurí
 áentsun tuakarun wáinkiar, suir iiniak, ti
 kajerkarmiayi. Tuma asamtai Páprun katsekkar
 “Ju chichaana júka ántar tawai” tiarmiayi.

⁴⁶ Támaiat Pápruka Pirnapíjjai arantutsuk
 chichainiak tiarmiayi “Israer-aentstirmin,
 atumin emka Yus-Chicham ujaktiniuji. Túrasha
 átum támaiatrum nakitramarme. Tura
 atumsha nakitia asarum, Yúsnum tuke iwiaaku

pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi. ⁴⁷ Nu túratarum tusa, Uunt Yus akuptamtsujik. Jes, ni Papiriin juna tawai:

“Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi. ⁴⁸ Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiyai.

⁴⁹ Tú tumakí Yus-Chicham nú nunkanam ashí jamarmiyai. ⁵⁰ Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiyai.

Áishman penkeri ármia nunasha, yajauch enentáimtikrarmiyai. Túram Páprun Pirnapíncha katsekkar, chichaman irunturar najatawarmiyai. Tú-turukiar ni nunkeya jiki awemarmiyai.

⁵¹ Túram Papru Pirnapíjiai, ju aentska yajauchiiti tusar, wéenak naweyan nunkan akakekiar ikiukiarmiyai. Túrawar Ikiuniu péprunam wearmiayi. ⁵² Yusa Wakanísha pimiútkamu ásar Yus-shuarka ti warasarmiyai.

14

Ikiuniu Péprunam túrunamia nu

¹ Ikiuniu péprunam Papru Pirnapíjiai jeawar Israer-shuar iruntai jeanam wayawarmiyai. Túrunawar Yus-Chichaman etserkarmiyai. Túram ti untsurí Israer-shuar ármia nu, Israer-shuarcha ármia nusha Yúsan umirkarmiyai.

² Tura chíkich Israer-shuar, Yúsan umirkacharu

ármia nu, Yus-shuaran kajerkarat tusar Israer-shuarchan yajauch enentáimtikrarmiayi. ³ Tuma asamtai Papru Pirnapíjjai nú núnkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitneñkratairin etserkarmiayi. Tura, etserinia nu winia kakarmarjainti tusa, Yuska aents túrachminian najanmamtikiawarmiayi. ⁴ Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi. ⁵ Tura nuyá Israer-shuarchajai Israer-shuarka chichasar pepru uuntríjjai chichasarmiayi. Tura Papru Pirnapíjjai katsekkar tura kayajai tukurar, yajauch awajsatniun nankamawarmiayi. ⁶ Túrasha Papru Pirnapíjjai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunkanam pujuiniawai. ⁷ Tura Yus-Chichaman etserkarmiayi.

Ristra péprunam Páprun kayajai tukurarmiania nu

⁸ Ristra péprunam tunamaru áishman pujumiayi. Ni akiiniamuríya tuke wekaichauyayi. ⁹ Nú áishman Papru chichaamun antúu pujumiayi. Túman Papru úmamkemas nin ísmiayi. Niisha, Yusa kakarmaríjjai tsuamartatjai, tu enentáimiun Papru nekaamiayi. ¹⁰ Tura Pápruka kakantar chícharak “Wajakim wewe ajasam wajasta” tímiayi. Tutai áishman wiut kutsuar wajaki wekaimiayi. ¹¹ Papru túramia nuna aents wáinkiar Rikiaunia chichamjai untsumainiak

“Yuska áishmaṅka áanin ajasaru in tarutramarji” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukuḡin iwiarkamun, wáakajai itiamiayi. Tura niisha ni áentsriḡjai wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴ Tura Jesusa akatramuri Pirnapísha Páprusha nuna nekaawar, auka nakitiaji tusar, ni pushiriṅ jaḡarmiayi. Túrawar aents írunmanum pachini-awarmiayi. ¹⁵ Tura tiarmiayi “Shuara, ḡurukamtai áitkiarum? Iisha yúschaitji. Atumea áankiitji, tiarmiayi. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunḡkancha, nayaantsancha, tura ashí nuḡ írunna nunasha najanaiti, tiarmiayi. ¹⁶ Jes, aents ni enentáimmiariḡjaiṅ wekasarat tusa Yuska yaunchu tsanḡatkamiayi. ¹⁷ Tuma ain shuaran penḡker awajsamujai Wiitjai Nekas Yus tusa paant awajmamsamiayi. Kame yumi yutuk-tinian nayaimpinmaya akupturmaji. Tura ejemamarar warasarmí tusa yurumak nerektinniasha súramji” tímiayi.

¹⁸ Túrasha Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun

yajauch awajsatniun enentáimtikrarmiayi. Tú tutaí Páprun kayajají tukurarmiayi. Tura jakayi tiar péprunmaya japiki júkiar arant áepsarmiayi. ²⁰ Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjiaí Tirpi péprunam wearmiayi.

²¹ Tírpinium pujusar uwempratín chichaman etserkarmatai untsurí shuar Yúsán umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. ²² Waketainiak “ashí Yus tana nu tímiatrusumek tuke umirkatarum” tuíniak Yus-shuaran ikiakáramiayi. Tura nin tiarmiayi, “Yusa akupeamuriin pachiinkiatájtákúrkia tí wáitsatniuitji.” ²³ Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsán áujсар chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmla nú Antiukíanam waketkiarmiayi

²⁴ Nuyá Pisitia nuñkanam nankaamakíar Pampiria nuñkanam jeawarmiayi. ²⁵ Nuí jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nuí kanunam enkemprar, yaunchu jíinkiarmla nú Antiukía péprunam waketkiarmiayi. Páprusha Pirnapísha tuke jíintsainí nú Antiukíanmaya Yus-shuar chichainiak, Yusa takatrí túrattarmena nuna Yus waitnentramak yáinmakarti, tiar akupkarmiayi nuikí. ²⁷ Nú Antiukíanam jeawar, Yus-shuaran irurar, ashí Yus nin

yáinkiarmia nuna ujakarmiyai. Tura nútiksanu Israer-shuarchan Uunt Yus uwemtikrataj tusa untsukmia nunasha ujakarmiyai. ²⁸ Tura nuyá Yus-shuarjaji Papru Pirnapíjiai núkap tsawant pujusarmiyai.

15

Jerusarénum Yus-shuara úuntrijaji iruntrarmiania nu

¹ Nu tsawantin áishmanu Israer nunkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprashtatrome” tiarmiyai.

² Tuma asamtai Papru Pirnapíjiai, núchaiti tusar, nú áishmanjaji ti kakaram chicharnaikiarmiyai. Túrusha nuu enentáiniak enentáimsatniun tujinkiarmiyai. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjaji Jerusarénum wétarum tusar akupkarmiyai. “Tura nui Jesusa akatramurisha Yus-shuaran wáinniusha iniasrum itiuurmainkit tusarum péñker nekaatarum” tiarmiyai. ³ Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiyai. Tura Yus-shuarsha nuna antukar ti warasarmiyai.

⁴ Tura Páprusha Pirnapísha Jerusarénum jeawarmatai Jesusa akatramurisha Yus-shuara wáinniurisha tura péñké Yus-shuarsha itiawarmiyai. Tura niisha túrunamia nuna mash etserkarmiyai. ⁵ Túrusha Pariséu aencha, Yus-shuar ajasarmiania nu, wajakiar chichainiak

“Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi. ⁶ Nuyasha Jesusa akatramurisha Yus-shuaran wáinniusha nu chichaman nekaatai tusar iruntrarmiayi. ⁷ Chichasua umikiarmatai Pítiur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. ⁸ Tura Yus Niñki ashí aentsu enentáin neka asa, Wíi shuar ájasmin áiniawai tusa, ni Wakanin Israer-shuarchan cha susamiayi, in suramsamij nútiksañ. ⁹ Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyān ni tunaarīn japirarmāi, tímiayi. ¹⁰⁻¹¹ Tura iikia nékaji niiya áantsarik Jesukrístu waitnenkartutairijiai uwempraitji. Nuñkia çurukamtia Yus uwempraru áiniawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsañchakait. Warí, ii úuntrisha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiayi Pítiur.

¹² Pítiur nuna tutai Pirnapísha Páprusha chichainiak, “Israer-shuarchasha ni kakarmarīn nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi. ¹³ Nuna ujasua amikmatai, Jakupusha tímiayi “Yatsurú, antuktarum. ¹⁴ Nuik túrachman Yus túramia nuna ii yachi Semuñ

Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi. ¹⁵ Jusha Yúsnan etserin yaunchu áarmia nu tímatrusan túrunayi. Júiti aarma:

¹⁶ “Israer-aents meserar, jea sáanakniua áintsan áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nunkanmaya aents, Israer-shuarcha ainia nu, winia náarun pachinia nu, Winia eatkarat tusan túrattajai. ¹⁸ Uunt Yus nuna yaunchu ujakmiayi.”

Tu áarmaiti’ tímiayi.

¹⁹ “Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajsachmi. ²⁰⁻²¹ Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarín jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap.” Tu áatratai’ tímiayi Jakupu.

²² Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiai wéakui, shuar níijiai nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áarmiayi. ²³ Tura níijiai ju papin árman akupkarmiayi:

“Isha Jesusa akatramur_i tura Yus-shuara wainniur_i tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiar_{me}. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume. ²⁵ Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachi Páprujai Pirnapíjaisha atumin írmasarat tusar akupeaji. ²⁶ Papru tura Pirnapísha ii Uuntr_i Jesukrístunam surumakarmiayi, ni takatrisha tsuumai ain túrami tusar. ²⁷ Niijjai Jútassha tura Sérassha akupeaji. Ii chichaajnia nuna niisha ni wenejai atumin ujatmakartatui. ²⁸⁻²⁹ Kame túratin asamtai iisha Yusa Wakaníjjai ju áartin enentáimsaji. Naman antar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chikichkia nú nankaamas tíhattaji. Tura antsu nu iniaisarmeka, pé_nker áatrume. Ayu, Yus wáitmakarti.” Tu áarman akupkarmiayi.

³⁰ Tura Antiukíanam akupkam wearmiayi. Nui jeawar Yus-shuaran irurar, papin súsarmiayi.

³¹ Tura Antiukíanmayá Yus-shuarsha nu papin

áujsar, pénker jintíamu chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. ³³ Tura nui ishichik tsawant pujusarmatai, Yus-shuarka, pénker wakеткиiarum, tiar akupkarmiayi. ³⁴ Tura Séras juáktinian wakerukmiayi. ³⁵ Páprusha Pirnapíjai juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nui Yusai ii yachi ainia nusha urukák pujuinia iyutai” tímiayi.

³⁷ Pirnapíkia Juan Márkusan iijai winiti tusa wakerimiayi. ³⁸ Tura Pampiria nuñkanam Juan Márkussa niisháa weu asamtai tura Yusa takatrin iniaisa asamtai, Pápruka ayatniun nakitramiayi. ³⁹ Papru Pirnapíjai ti kakannairar kanakarmiayi. Tura Pirnapíkia Márkusan ayaki Chípriniam wémiayi. ⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi. ⁴¹ Tura Siria nuñkanmaani wekaráktak, Yus-shuaran ikiakárkutak Sirisianam jeamiayi.

16

Páprusha Sérasjai Timiutéun júkiarmiania nu

¹ Papru Sérasjai Tirpi pepru íirkutak Ristra péprunam jeawarmiayi. Tura nui Rístranam Yús-shuaran wáinkiarimiayi, ni naarii Timiutéu.

Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi. ² Tura Ristra péprunmaya Ikiuniu péprunmayasha Yus-shuar ármia nu, Timiutéu pénker wekaawai, tiarmiayi. ³ Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nuí pujuarmia nu yajauch enentáimpraráin tusa tsupirmamtikiamiayi. ⁴ Tura nuyá Papru Timiutéujai ashí péprunam nuí sétur nuí sétur wéenak Jesusa akatramurisha Yus-shuaran wáinniusha Jerusarénum nuik jintintian umiktarum tusa ujarkutak wearmiayi. ⁵ Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawenki wearmiayi.

Papru iimiarmia nu

⁶ Tura Yusa Wakaníkia Páprun Yus-Chichaman Asia nunkanam ujaktinian tsankatkachmiayi. Tuma asamtai Pirijia nunkanam tura Karasea nunkanam airkutak, ⁷ Misia nunka jeatniunam jeawarmiayi. Túrunawar “Pitinia nunkanam wetai” tiarmiayi. Túrasha Yusa Wakaní nuisha wétinian suritkiarmiayi. ⁸ Tuma asamtai Misia nunkanam menantki Truas péprunam pachiniawarmiayi. ⁹ Nuí jeawar Papru kashi iimiarmiayi. Masetúnia nunkanmaya áishmankan wajan wáinmiayi. Nu áishman Páprun chicharuk “Winitritia. Yáintkiamnium” tímiayi. ¹⁰ Nuyanka tu iimiarmatai, wisha Páprujai wetai tusar iwiarnarmiaji. Tura Yus incha nú nunkanam

ni chichame etserkat tusa ti nekas untsurmakrin wéaji, tímiaji.

Jiripius Péprunam túrunamia nu

¹¹ Tura nuyanka kanunam enkemprar Truas péprunmaya jíinkir Samutrásia nunkanam jeamiaji. Tura kashin tsawar nuyanka katjarar Niápuris péprunam jeamiaji. ¹² Tura Niápurisnumia náwek Jiripiusnum jeamiaji. Nuí Jiripius péprunmanka Rúmanmaya aents matsamsa ármiai. Tura nú péprusha Masetúnia nunkanam nekas uunt pepruyayi. Tura nuísha seturmaji. ¹³ Nuyá sáwartin tsawarmatai pepru ikiukir entsá supichik wémiai. Yus áujsatniun iruntrarmia nuí pujusar, nuwá iruntrarmia nu Yus-Chicham ujakarmiaji. ¹⁴ Nuí Tiatira péprunmaya nuwá, ni naari Ritia wáinkiamiaji. Niisha tarach yamakain pénkeran súriniuyayi. Yúsnasha shiir awajniuyayi. Yus-Chichaman Papru etserkama nuna niisha pénker anturkamaiaji. Túman, Uunt Yus Papru chichaamun umirkat tusa ni enentáin takasmiayi. ¹⁵ Túruna nú nuwá níniurijiaí imianmiayi. Tura nuyasha chichaak “Yus-shuar nekas ajasai túrutkurmeke winia jearuí winitiarum” tímiayi. Tura nuí jeawakrin setumtikrampramiaji.

¹⁶ Tura nuyá ukunam Yus aujsatai tusar wekaamar nuwách nekaamin-iwianch enkemtuamu inkiunmakmiaji. Nu nuwáchikia misatkauyayi. Niisha nékamkui nérenniurisha ti kuitriniawarmiaji. ¹⁷ Tura nú nuwách incha Pápruncha pataaturmamiaji. Tura kakantar untsumuk “Ju áishmansha nekas Uunt Yúsan umirkaru áiniawai. Tuma asa niisha atumin

uwempratin chichaman ujatmarme” tímiayi. ¹⁸ Tura nú nuwächisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijjai tájame: jíinkitiá ni enentáiya” tímiayi. Tutai íwianchkia nú chichamaik jíinkimiayi.

¹⁹ Tura nuwächi nérenniurisha, íwianch jíiki awematniun nekaawar, Páprun Sérasnasha kakerak achikiar pepru uuntri ísarat tusar ajapén júkiarmiayi. ²⁰ Tura pepru úuntriin ejeniar tiarmiayi “Ju áishman Israer-shuar áiniawai. Tura in páchim enentáimtikramainiaji. ²¹ Tura iisha Rúmanmaya aents árin, ii túrachminian, iikia asumprachman jintintramainiaji” tiarmiayi. ²² Tura nuyanka ashí aents Páprun Sérasnasha kakerkarmiayi. Túramtai pepru uuntri chichainiak “Pushiri áitkiarum numijjai asutiátarum” tiarmiayi. ²³ Tura nuyá ti asutsua amikiar sepunam enkeawarmiayi. Tura sepú-iinian chicharuk “Ti pénger iistá pisararain” tiarmiayi. ²⁴ Nu chichaman antuk, sepú-iin ti init awayámiayi, tura nawen numi najanamujai tee chanuntamiayi. Tú tura ikiukmiayi. ²⁵ Tura kashi ajapén Papru Sérasjai Yusan áujainiak kantampriarmiayi. Tura chíkich enkeamusha nuna antúu pujuarmiayi. ²⁶ Tu pujuiniaj aya aneachma ti kakantar uurkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujai enkekar jinkiamusha mash atiniakarmiayi. ²⁷ Túrunamtai sepú-iin shintiararmiayi. Tura wáitisha mash uranar aan wáiniak, enkeamusha jíiniar shiákchariash

tusa ni puniariniak ukuiniak máamattsa pujumiayi. ²⁸ Tura Papru untsuak “Amek yajauch awajmamsaip. Ashí pujuiniaji” tímiayi.

²⁹ Tutai sepú-iincha jinia ekeemak tsékenki wayamiayi. Tura Papru Sérasjai pujamunam kurañki jearmiayi. ³⁰ Tura aa jiiiki aniasmiayi “Uunta, ¿warí itiurkattaj uwemprataj tusana?” tímiayi. ³¹ Tutai niisha tiarmiayi “Uunt Jesukrístu nekas enentáimtustá. Túrakmeka amesha, tura áminiurmesha uwemprattarme” tiarmiayi. ³² Tura nuyá ashí ni jeen pujuarmia nunasha Yus-Chichaman ujakarmiayi. ³³ Tura tsawant irankai sepú-iincha Páprun Sérasjai numpamnamurin nijiararmiayi. Túramtai nuyasha sepú-iincha nuarijiai uchirijiai imianiararmiayi. ³⁴ Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurijiai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. ³⁶ Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia péñkerak jíinkitiarum” tímiayi. ³⁷ Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiañ asutiámamji. Túrawar sepunam enketmamji. Tura ¿urukamtai yamaikia uuk akuptamkataj tusa wakeruinia? Atsá. Antsu uuntcha niniki taar jiiirmaktiai” tímiayi.

³⁸ Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi

Ruma aentsun nekaawar. ³⁹ Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya jíikiar “Yamaikia wáitneasrum wetarum” tiarmiayi. ⁴⁰ Papru Sérasjai nuyá jíinkiar Ritia jeen wearmiayi. Tura Yusshuaran ikiakárar ikiukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nui Israershuara iruntai jee ámiayi. ² Tura Pápruka nuna tuke túrin asa nu jeenam wémiayi. Tura nuisha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusan jintintiararmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarne” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujai Sérasjaisha tsaninkiararmiayi. Tura Kriaku aencha ti untsurí Yúsan umirkarmiayi. Tura nuwá penkeri armia nusha nútiksaran umikiarmiayi. ⁵ Tura Israershuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman naki yujáu armia nujai chichasar nu peprunam charáa charáa ajarmiayi. Tura Páprun Sérasnasha achikiar aentsu úuntrin suruktai tusar Jasunka jeen árenkarmiayi. ⁶ Túrashá Páprun

Sérasnasha awetrar, Jasunkan tura chíkich Yus-shuarnasha achikiar japirkutak júkiarmiayi. Tura pepru úuntrin juíniak tiarmiayi “Ju áishmansha ashí nunkanam charaatum ajá wekarmia nu yamaikia tímiajai tarutramarji. ⁷ Tura ju Jasun ni jeen itiaarmiayi. Tura niisha ashí mash Rúmanmaya uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi. ⁸ Nu chichaman antukar, aents nui pujuarmia nu, úuntrimiak charaatum ajarmiayi. ⁹ Tura Jasun chíkich Yus-shuarjai Papru nekas awemattaji tusar, paj, kuit ikuaji, tiarmiayi. Nuna takui pepru uuntrin nin akupkarmiayi.

Piríanam

¹⁰ Nuinka nú kashi Yus-shuar Páprun Sérasnasha Piría péprunam akupkarmiayi. Tura nui jeawar Israer-shuar iruntai jeanam wearmiayi. ¹¹ Piríanmaya aentska Tisarúnikianmaya áentsjainka nankaamas penker enentáimka ármiayi. Tuke enentáijai Yus-Chichaman ántiarmiayi. Túrawar tuke tsawant imia ninkasha Papru tana nuna nekasashit tusar Yusa papirin ii wearmiayi. ¹² Tuma ásar untsuri shuar Yus-shuar ajasarmiayi. Tura Kriaku aents nuwa penkeri armia nusha áishmansha umikiarmiayi. ¹³ Túrasha Tisarúnikianmaya Israer-shuarka Papru Yus-Chichaman Piría péprunam étserun antukar nui weriar charaatum awajiarmiayi. ¹⁴ Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujai nuinka Piríanam juakarmiayi.

¹⁵ Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nui nú péprunam ántar-yus ti írunkui Páprusha kúntuts enentáimmiayi.

¹⁷ Tuma asa Israer-shuar iruntai jeanam Israer-shuarjai tura chíkich aents Yúsan enentáimtiarmia nujai chichasmiayi. Tura tuke tsawant pepru ajapén aentsjai inkiunaikiar chichasarmiayi.

¹⁸ Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamuriñ tura aents jakamunmaya nantaktinian étserkui nuna tiarmiayi. ¹⁹ Nuyanka aents iruntainiam, naari Ariupaku támanum Páprun júkiarmiayi. Nuisha tuke irunin ármiai. Nui Páprun aniasarmiayi “Iisha ame yamaram támena nu nekaatai tusar wakeraji, tiarmiayi. ²⁰ Amesha nusháa chicham jintinaitme. Túmaitkiui ju chichamsha warintuak tusar nekaatai tusar wakeraji” tiarmiayi.

²¹ (Atenasnumiá aencha tura chíkich nunkanmaya shuar nui pujuarmia nusha aya yamaram chicham amia nunak ántiarmiayi. Tura aya nunak áujmatiarmai.) ²² Nuyanka Papru Ariupakunam ajapén wajaki tímiayi “Atenasnumiá áishmanṭiram, wi nékajai, atumsha

atumi yusri ainia nuyá tsurakchamniaitrume, tímiayi. ²³ Kame wi nuik atumí yusri enentáimtutainiam ístaj tukaman nuí jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrume' tímiai.

²⁴ 'Nekaatarum, nu Uunt Yuska ashí nuñkan tura nuí írunna nuna najanaiti. Tura Niisha nayaimpin nuñkancha nérenniurinti. Tura aents najanamú jeanam nú Yuska pujuchuiti.

²⁵ Niisha aents yáinkiat tusa atsumatsui. Warí, imia-nin̄ki Niisha ii iwiaakmarin, ii mayattairincha tura ashí írunna nunasha súramtsujik, tímiayi. ²⁶ Nekaatarum. Nu numpanmayanak ashí áentsun najanamiayi ashí nuñkanam matsamsarat tusa. Tura Yuska ii tsawantrin nekapmaiti; ii pujustinniasha nútiksañ nakakmiayi. ²⁷ Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi. ²⁸ Jes, iisha Yusjai iwiaakji. Yusjai muchitiaji. Tura Yusjai ii kakarmari takakji. Nútiksañ atumí papí-aintri tíchamka "Ashí incha Yus najatmaitji." ²⁹ Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi. ³⁰ Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk "Tunaaruminiá enentáimpratarum" túramji, tímiayi. ³¹ Yuska áishman̄kan anaikiaiti. Nú áishman̄ ashí aentsti, yáki pēñkeran túriniait, yáki yajauchin túriniait

núnaka nekarmattaji. Nú áishman Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Niñki achikiuiti. Túrasha nekas anaikiajai tusa, tura ashí áentstiram nekaatarum tusa nú áishman kan jakamunmaya iniantkimiayi” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmi” tiarmiayi. ³³ Tutai Papru iniaisamiayi. ³⁴ Tura chíkich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuwa, ni naarj Támaris, tura chíkich aencha nútiksaran nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi. ² Tura nuj Israer-shuaran ni naarj Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujaj uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nunkanmaiti. Nu awemamu ásar Akira Kurintiunam nuik támiayi nuwe Pirisírajaj. Tura Pápruka Akiran chichastaj tusa werimiayi. ³ Akirasha Páprusha mai juna takau ármiayi, tarach ti núparman jea najantain najanin ármiayi. Tuma asamtai Papru Akiraj seturmiayi nu takat túrawartai tusa. ⁴ Tura tuke sáwartin Papru Israer-shuar iruntai jean wéuyayi. Nuisha Israer-aentsun

Kriaku-aentsnasha nútiksaran Yus-Chichaman ujakar enentáimtikrarmiayi.

⁵ Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamuri Kristu, atum nákarmana nu Jesusaiti” tímiayi. ⁶ Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuin_̄kia ikiuajrume tusa, ni pushirin pear tímiayi “Atumek makuumarme. Tura wikia Yusai makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

⁷ Tura nuyanka Israer-shuar iruntai jeanmaya jiinki, Yusan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi. ⁸ Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuar_̄jijai uchir_̄jijaisha Yusan umirkamiayi. Tura chíkich aencha Kurintiunmaya armia nu nútiksaran Yus-Chichaman antukar, Jesusan enentáimtusar imianiarmiayi.

⁹⁻¹⁰ Nuyá Uunt Yus Páprun mesekran ipiatkamiayi. Chicharuk “Pe_̄nké ímiatik awajtamsachartatui Wi ámij_̄ai pujakuí. Ju péprunmasha untsur_̄i aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

¹¹ Tura nuí Kurintiu peprunam jimiara uwí ejesattuk Yus-Chichaman étseruk pujumiayi.

¹² Tura Kariun, Akaya nunka akupniuri anaikiamu ai, Israer-aents Páprun kajerkarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. ¹³ Tu túrawar

akupniun chicharainiak “Ju áishman Yúsan umírkatniun Muisais akupkamia núnaka íkias ausháa jintíawai” tiarmiayi. ¹⁴ Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuinkia, tura akupniun umirchakuinkia, tárumna nuna anturkaintjarme. ¹⁵ Túrasha aya chichamnak tura aya náariniak atumí uuntri akupkamia nunak tau asamtai, atumek nuámtak ístarum tájarme. Wikia nu chichamnum pachinkiatniun nakitiajai” tímiayi. ¹⁶ Taku aa jíikmiayi. ¹⁷ Tura nuyanka Kriaku aents Israer-shuar iruntai jea úuntrin Sústinisian achikiar awatiarmiayi akupniusha íimmianuman. Túrasha akupin Kariunka túranak penké pachischamiayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusai yachi ármiania nuna áujas ikiuak Pirisírajai ni aishri Akirajai Senkrea péprunam wearmiayi. Nui Israer-shuar túrutain umiak Papru ni intiashin awampramiayi, nuik Yúsan tímiaj nuna yamáí umíajai tusa. Nuinkia kanunam enkemprarmiayi Siria nunkanam waketkitiai tusar. ¹⁹ Tura nuyá Ipiisu péprunam jeawar Pápruka Pirisíran tura Akiran ikiukmiayi. Tura Israer-shuar iruntai jeenam wayá Israer-shuar irunar pujuarmia nujai chichasmiayi. ²⁰ Tura niisha Páprun juin pujustá tusar seawarmiayi. Túrasha támaitiat, tujintiajai, tímiayi. ²¹ Nuyanka áujas ikiuak “Wisha Jerusarénum

námper átatna nuna pachiintiuktiniaitjai. Tura Yus akuptakuinkia atak tatajai atumin íistaj tusan” tímiayi. Tura kanunam enkemar Ipisiunmaya jíinkimiayi.

²² Nuyá Pápruka Sesaría péprunam jeá, nuyanka Jerusarénum wémiayi, Yus-shuaran nuí áujsataj tusa. Tura nuyá Antiukíanam wémiayi. ²³ Tura Antiukíanam ishichik pujus ataksha weak Karasea nunkanam tura Pirijia nunkanmaani wekaráktak wémiayi. Tura weak Yus-shuar matsamarmia nuna chicharak ikiakáarmiayi.

²⁴ Tumáa pujaj Arijiántria péprunmaya Israer-aents Apurus Ipisiu péprunam jeamiayi. Niisha Yusa yaunchu papirín ti péñker nekaamiayi. Et-serkatniuncha ti nékauyayi. ²⁵ Uunt Yus tímia nunasha unuimiátrauyayi. Tura tuke enentáijjai chichasmiayi. Jesusa túramurín péñker jintinniuyayi. Túrasha aya Juan imiakratmanak nekaamiayi. ²⁶ Ju Apurus arantutsuk Israer-shuar iruntai jeanam chichamiayi. Tura Pirisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

²⁷ Nuyá ukunam Apurus, Akaya nunkanam wétaj takui, Ipisiunmaya Yus-shuar yáinkiar papí áarar atakas akupkarmiayi. Nú áentsnum péñkerak jeat tusar túrawarmiayi. Tura Akayanam jeá, nú áentsun Yusa waitnenkratairijjai uwempraru ármia nuna ti yáinkiararmiayi. ²⁸ Tura Apurus Israer-aentsjai paant chichasmiayi. Túrasha Yusa Papirijjai, Jesussha nekas Yusa anaikiamurinti tusa paant jintíak nincha nupetkamiayi.

19

Papru Ipisiunam jeamiayi

¹ Tura Apuruska Kurintiunam pujái Pápruka náinniumaani wekaráktak, Ipisiunam jeamiayi. Tura nuísha Yus-shuaran wáinkiamiayi.

² Tura aniasmiayi “Atumsha Yus-shuar ajasmarmena nuí, ¿Yusa Wakaní atumí enentáin enketurmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarme imianmiarum?” tímiayi.

Tutai niisha tiarmiayi “Juan jintintramamij nu iisha enentáimsar imianmij” tiarmiayi.

⁴ Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruí winittiana nu nekas enentáimtustarum. Niisha Jesus Yusa anaikiamurínti, tu ujatmakchamka” tímiayi Papru.

⁵ Nuna antukar niisha Uunt Jesusa náarín enentáimtusar ataksháa imianiarmiayi. ⁶ Tura Papru ni uwejejai nin antinmatai Yusa Wakaní tarurarmiayi. Túram chíkich chichamjai chichasarmiayi. Túrunawar Yus-Chichaman etseriarmiayi. ⁷ Nusha tuse (12) áishman árimiayi.

⁸ Tura nuísha menaintiu nantutin Papru Israer-shuar iruntai jeanam werí Yusa akupeamurín pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi.

⁹ Tura chíkichka ni enentáin ti ikiatsuárarmiayi.

Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asamtai Papru Yushuarnaka akanki yaruak Tiranu iskuirariin tuke tsawant Yus-Chichaman ujaarmiayi. ¹⁰ Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurin antukarmiayi. ¹¹ Tura aentsti túrachminian túrat tusa Yuska ni kakarmarin Páprun susamiayi. ¹² Jáanchniasha pushincha Papru antinman júkiar, nánkamas jaa shuaran etetim, nú jaa shuarsha nuna antinmiar péñker ajaarmiayi. Iwianchrukusha nuna antinmiar, íwianch jíinkimtai ankant ajaarmiayi.

¹³ Tura chíkich Israer-aents uwishin ármiai. Tura niisha chíkich chíkich péprunam wear iwianchrukun iwianchrin jíirki akuptin ármiai. Tuma asa niisha Jesusa náaríjjai iwianchin jíiktiai tusar, iwianchin chichartuiniak “Nu Jesus Papru ujaana nuna náaríjjai jíinkitiarum tájarme” tiarmiayi. ¹⁴ Tura Israer Patri uuntri Esewia náartin, siati uchiri ármia nu, nuna túriarmiayi. ¹⁵ Túrasha Jesusa náaríjjai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, zyátsukaitrum?” tímiayi. ¹⁶ Nuna tinia iwianchruku áishman tsékenki nú áishman kan kakaram katsumak nupetkarmiayi. Túram ti katsumam niisha misú tura numpamnawar jíinkiar pisararmiayi. ¹⁷ Nusha Ipisiu péprunam túrunamiayi. Túrunamtai Ipisiu péprunmaya Israer-shuarsha tura Israer-

shuarchasha nuna túrunamun nekaawar ti ashamkarmiayi. Tura Uunt Jesusa náarin shiir awajsarmiayi.

¹⁸ Túmainiai untsurí shuar Yúsan umirkaru Yus-shuar ajatsuk tunáa túrawarmia nuna paant ujakarmiayi. ¹⁹ Tura untsurí uwishniumawarmia nu, wawekratai papí ármia nuna itiarmiayi. Itiar, júka iniaiyaji tusar, ashí íimiainiain áesawarmiayi. Nú papí áesawarmia nuna kuítrisha senkuenta mir (50.000) nankaamasauyayi. ²⁰ Tu túrunamtai Uunt Yusa chichameḡ pampanki tura nupetmaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. ²² Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninkia Asia nunkanam seturmiayi.

Ipisiunam ti charaatum ámiania nu

²³ Pápruka tuke Ipisiunam pujái, nuyá aents Yus-Chichaman nakitiainiak charaatum ajarmiayi. ²⁴ Iis, nui Ipisiunam kaya-yusa jee ámiayi. Nu yus núwauyayi, Tiana naartin. Tura áishmanḡ, Timitriu naartin, nú jean nakumak uchichin najanniuyayi kuitjai. Tura niisha nú takatjai ti kuítrintin ajasmiayi. Tura chíkich áishmanḡ nú takatan takarmia nunasha ti kuítrintin awajsarmiayi. ²⁵ Timitriusha niijjai takarmia nuna ikiaanak, chikichnasha niijjai

métek-taku takarmia nunasha ikiaanak niijjai charaatum ajarmiayi. Timitriusha tímiayi “Winia írutramutiram antuktarum. Iisha ju takat takaajnia jujai ti kuit achíatsjik. ²⁶ Tura atumsha ju Papru wáintrumna nu tura ántarmena nu chichaak “Ashí aents najanam yuska ántar ániawai” tatsuk. Nuna tau asa, jui Ipisiunam, tura arant ashí Asia nunkanam, ni yúsrin iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk. ²⁷ Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusrí Tiana jeen shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajiáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsunmiarmiayi.

²⁹ Nuinkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiayi. ³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi. ³¹ Tura Asia nunkanmaya uuntri, Páprun amikri ásar, ainkia wayawain tusar chichaman akuptukarmiayi. ³² Túrasha irunar pujuarmia nu, páchim enentáimprar, chíkichka nusháa untsunmiarmiayi. Tura chikichcha nútiksaran ausháa untsunmiarmiayi. Tura chíkichka ti

untsurí, nekaachar “wariniak irunturara” tiarmiayi. ³³ Chíkich nui wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimiayi. ³⁴ Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

³⁵ Ipisiu pepru papí-aintrisha áentsun itiat-mamtik tímiayi “Ipisiu shuártiram antuktarum. Ii uunt yusrí Tiana jee ístinia íchukaitiaji. Tura ni nakumkamurisha nayaimpinmaya iniarmiania nusha íschatniukaitiaji. Tura nunasha ashí aents paant nékainiatsuk, tímiayi. ³⁶ Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi. ³⁷ Ímiatarum. Ju áishman atum itiarumna nu, ii yúsrin yajauch chicharkacharai. Tura ni jeeñ yajauch awajsacharai. ³⁸ Wats, Timitriu tura niijiai takainiana nu tunáa túramun ujaktai tusar wakeruiniakka pepru penkerin werishtinkiait. Nuinkia máimtek iwiainiakartí. ³⁹ Tura chíkich chicham ákuinkia penker iruntrarum iwiatarum. ⁴⁰ Kame ju yamáí túrunamun nekaawar Rúmanmaya kapitián “Ii uunt kapitiántri yajauch awajsatai tusarum túrachurmeash” turamchatjiash. Warí, niisha “¿Urukantai charaatum ajarum?” takuisha, áimkiatin penké tujinkiattaji” tímiayi. ⁴¹ Tura papí-aint nuna tuasua amik “Áukete. Wétarum”

tímiayi.

20

Papru Masetúnia nuñkanam Krisia nuñkanmasha wémiania nu

¹ Charaatum ajasua amikiarmatai Papru Yus-shuaran untasuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. ² Nú nuñkanam wekaráktak, Yus-shuaran jintintrar ikiakármayi. Tura nuyasha Krisia nuñkanam jeamiayi. ³ Nui menaintiu nántuk pujusmiayi. Tura nuyanka kanujai Siria nuñkanam wétasa pujus Israer-shuar chícham jurusman anturmamak “antsu nuñkan Masetúnianmaanĭ wetajai” tímiayi. ⁴ Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpimaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiayi. ⁵ Túrawar niisha emki wear Trúas péprunam jeawarmiayi. ⁶ Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nuñkanmaya jíinkimji. Tura senku tsawant nankaamasmanum emki wearmia nu amaiyanĭkarmiaji Trúasnum. Tura nuisha siati tsawant pujusarmiaji.

Trúas péprunam túrunamia nu

⁷ Tura tumintin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiayi. Kame Pápruka kashinkia

wétin asa chichaa-chichaakua kashi ajapén ejemi-
 ayi. ⁸ Tura yakí menaintiu pátaranam, tesaamu
 ámia nuḷ iruntrarmiaji. Nuḷsha ji ekemarma
 untsurí irunmiayi. ⁹ Tura nuḷsha natsa Eutikiu,
 áankamunam ayamas pujusmiayi. Tura Papru
 ti esaram chichaakui nu nátsasha kari pujumiayi.
 Tumáa pujus kanaki yakí pátanmaya akaiki ini-
 aamiayi. Tura penké jakan júsarmiayi. ¹⁰ Tura Pa-
 pru akaatuki tsuntsumprua miniakkamiayi. Tura
 Yus-shuaran chicharainiak “Ashamkairap. Atak-
 sha iwiaakui” tímiayi. ¹¹ Nuyá ataksha Papru
 wakamiayi. Tura tañtan puukar yurumáwarmatai,
 tuke chichaa-chichaakua tsawantmarmiayi Pa-
 pru. ¹² Eutikiuncha iwiaakun ni jeen júkiarmiayi.
 Tura ashí aents shiir enentáimsarmiayi.

Miritiunam wearmiayi

¹³ Wats, Papru Asuḷ péprunam nunḷkan we
 jeatajtsa wakerimiayi. Tura incha, átumka
 kanunam wétarum, turamkurin, iikia emkir
 wémaji Asuḷnum. ¹⁴ Nuḷ Asuḷnum inkiunaikiar,
 Páprusha kanunam enkemprantai, Mitiríniniam
 jeamji. ¹⁵ Tura nuyá jíinkir, kashin tsawarar Sámus
 péprunam jeamji. Tura nuyanka Trujiriunam
 jear ayampramji. Nuyasha kashin tsawarar
 Miritiunam jeamji. ¹⁶ Pápruka Jerusarénum
 wari wétajtsa wakerimiayi, pintikiustís naartin
 jístatin pachiinkiataj tusa. Tuma asamtai,
 Asia nunḷkanam ti núkap pujustinian nakitiak
 “Ipisiunam wéhattajai” tímai.

Papru Ipisiunmaya úuntrin áujsamiania nu

¹⁷ Túrasha Papru tuke Miritiunam pujus,
 Ipisiunmaya Yus-shuara úuntrin winitiarum

tusa untsukarmiayi. ¹⁸ Ni taarmatai Papru tímiayi “Atumsha wi Asia nun_{kan}am pujusan itiura túraj nu nékarme. ¹⁹ Atum_{jai} tuke tsawant pujumaj nu_i, nan_{ka}amantuchu enentáimtumasan, úutchim winia Úuntrun takatr_{in} takasmiajai. Tura Israer-shuar yajauch awajtustinian wakerutainia_{in} tuke takasmiajai. ²⁰ Ashí pé_nker ana nu nekaatarum tusan mijiatrutsuk jintintiamjarme. Iruntramarmena nu_i tura an_{kant} an_{kant} atumí je_{en} pujumarmena nu_{isha} Yus-Chichaman ujakmajrume, tímiayi. ²¹ Tura Israer-shuarnasha Israer-shuarchancha nútiksanak, enentai yapají_{arum} Uunt Jesukrístu umirkatarum, tímiajrume. ²² Tura yamáí Jerusaré_{num} wéajai, Yusa Wakaní túrutkui. Nu_{isha} túrunatana nunasha nekamatsuk wéajai. ²³ Tura Yusa Wakaní iniakturkui ju_{na} nékajai, ashí pepru wi jeattajna nu_i en_{ket}átai tusar nákarainiawai. Tura ti wáitsatniun nekapsattajai. ²⁴ Kame wikia jákashtajash. Túrasha warí winia itiurtawa. Wikia Yusa jinti_{in} warasan wekasataj tusan wakerajai. Yusá_i wea-wéakuan jáakun iniaisataj tajai. Tura nuyá takatan Uunt Jesus surusmia nuna pé_nker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ ‘Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrume. ²⁶⁻²⁷ Nekaatarum, ashí Yusa wakeramur_{in} wisha pen_{ké} ú_{ur}tsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia

penké makuumashtatjai. ²⁸ Tuma asamtai emka atumek ímiastarum. Túrarum nuyá chíkich Yus-shuar ístarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. ²⁹ Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. ³⁰ Túrasha nemartusarat tusar wakeruiniak atumijnian wait chichaman unuikiartin wantinkiartatui. ³¹ Tuma asamtai yatsurtiram, aneartarum. Wisha menaintiú uwitin tsawaisha káshisha úutchim ankant ankant unuiniamajrumna nu kajinmatkiirap' tímiayi.

³² 'Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuarar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nui pachiinkiattarme. ³³ Wats, wisha chikichki shuara kuítrin wariríncha wakerutkachuitjai. ³⁴ Antsu winia uwejrui takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme. ³⁵ Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. "Achiana nujainkia nankaamas, súana nuka shiir waraawai" tíchamka" tímiayi.

³⁶ Nuna tuasua amik Papru tikishmarmiayi. Tura ashí niijiai iruntrarmia nú shuar Yúsan

áujsarmiayi. ³⁷⁻³⁸ Tura Papru nuik chichaak “Atakka wáitkiashtatrume” tiniu asamtai, ti kúntuts pujuiniak, úutchim Páprun miniaksarmiayi. Túrawar kanunam ejeniarmiayi.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji.

² Tura nuí Pataranam pujusar, chíkich kanu Pinisia péprunam wea wáinkiamji. Túmakui nuí enkemprar wémaji. ³ Nuí wésar Chipri nuñkaka wáinkiamji. Chíprikia menanmaaní aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jíinkir péprunam wayamji. ⁴ Nuí Yus-shuar wáinkiar nuín siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiayi.

⁵ Tura siati tsawant nankaamasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujsamji.

⁶ Tura nu amikiar nuñkia áujnaisar ikiukiarmaji. Tura iikia kanunam enkemprakrin nínkia ni jeen waketkiarmiayi.

⁷ Iisha Tirunmaya entsak wea-wéakuar Turumáitianam nuín jíinframji. Tura nuí jearsha Yusai yachi ármia nu chichasar nuín chíkichkí

tsawant pujusmaji. ⁸ Kashin tsawarar nuyá jíinkir nun_{ka}n weri Sesaria péprunam jeamji. Nui Jiripi jeen jear pujusmaji. Jiripikia Yus-Chichaman etserniuyayi. Nuik Jerusaré_{nn}num siati áishman_{ka}n Yusa takatr_{in} wáinkiarat tusar anaikiarmia nú Jiripiiti. ⁹ Jiripisha kuaru nawantr_{in} yarumkauyayi nuatnakchan. Niisha Yusa chichamen etserin ármiai. ¹⁰ Tura iisha Jiripi jeen wárum tsawantak pujarin Jutía nun_{ka}nmayá aents Yusa etserniur_i, Akapu náartin támiayi. ¹¹ Niisha taa Papru emenmamkar_{in} achikmiayi. Tura achik ni_nki ni nawen tura uwejencha jin_{ki}amamiayi. Nuna tura tímiayi “Yusa Wakan_i tawai, juna emenmamka nérenniur_{in} Israeraents jútikia jin_{ki}áwar Israer-shuarchanum surukartatui, tawai” tímiayi. ¹² Iisha nu antukar Papru tímiayi “Jerusaré_{nn}numka weep.” Sesarianmayá Yus-shuarsha núnisa_n Páprun tiarmiayi. ¹³ Tutai Papru tímiayi “¿Urukamtai úutkuram winia enentáiruj kúntuts awajtarum? tímiayi. Wi Jesusna asamtai Jerusaré_{nn}num jin_{ki}ataniakuisha mántuiniakuisha ashamatsjai” tímiayi. ¹⁴ Tura iisha Papru emetatai tukamar tujinkiar “wats, nui_nkia Uunt Yus wakera nu tímianak atí” tiarmaji.

¹⁵ Nu tiri iniaisar iwiarnarar Jerusaré_{nn}num wémaji. ¹⁶ Chíprinmayá yaunchu Yus-shuar Man-asun_n ni jeen Jerusaré_{nn}num takakuya nuna ikiatmastinian wakerimiayi. Tuma asamtai Sesarianmayá ishichik Yus-shuar nemartamainiak Man-asun_nnasha júkiarmiayi.

Papru Jakupu jeen irastajtsa wémiania nu

17 Tura iisha Jerusarénum jeawakrin, nu_i warasar Yus-shuar ti shiir áujtamsarmiaji. 18 Tura kashin tsawar Papru ímiak Jakupu jeen wémiaji. Nu_isha Yus-shuara uuntr_i matsamarmiaji. 19 Páprusha áujas amik, Israer-shuarchanum ni étsermajai Yus túramia nuna yámankamtaikniumia júkí chikichkimas ujakar ujakar awajsamiai. 20 Papru taman antukar “Yus ti pé_nkerchakait” tiarmiayi. Tura Páprun ju chichaman tiarmiayi “Támena nu pé_nkeraiti, yatsurú, túrasha Israer-shuar timiá untsur_i Yus-shuar ajasu áiniayat, “ashí Muisais akupkamia nu umiktiniaitji” tuiniawai. 21 Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chíkich nu_nkanam pujuinia nuna Muisais akupkamur_i umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” 22 Wátsek, yatsuru, nu_iñkia itiurmain_ikit. Ame tátintrumin aents nekaawarka ju_i kajertamainiak káutramkachartatuak. 23 Wats, antsu nu_iñkia, ju túrata yatsuru. Ju_i kuaru áishman_u Yúsán yaunchu tiarmia nuna umiktasa pujuiniawai. 24 Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiash_in awampratin áchattawak. Nu áishman_{ka} intiash_in awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui.

²⁵ Túrasha yatsuru, nekaata, Israer-shuarcha Yus-shuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtiniaitrome, tímiaji. Tura numpasha umarchatniuitrome, kajemtikramusha yúashtiniaitrome. Tura tsanirmashtiniaitrome. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiaamararmiayi, Muisais timia nútiksaran. Tura Yusan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi.

²⁷ Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiarmai. Túrawar charaatum ajakiar Páprun achikiarmiayi. ²⁸ Achikiar unsumainiak “Israer-shuártiram in yáinmaktarum. Ashí nunkanam Muisais akupkamurincha Israer-shuarti túrutairincha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamá ju Jeencha yajauch awajturmají” tiarmiayi.

²⁹ Jes, nuik Ipsiunmaya Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi.

³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya jíikiarmiayi. Túrawar wáitinha nú chichamaik epentrarmiayi. ³¹ Tura

maatai tusar matsamtuiniáj̄i suntara kapitiántri Jerusarénn̄umiā aents ashí charaatum ajainian antukmiayi. ³² Kapitiáncha ni suntar̄in tura sarjentuncha irur tseke weriarmiayi aents pujuarmia nuj̄. Aencha suntaran tura kapitiánin wáinkiar, Páprun asutíniayat iniaisarmiayi. ³³ Kapitiánka Páprun jeari achikmiayi. Tura jimiará jiruj̄ai j̄inkiamiayi. Nuyasha aniasmiayi “¿Niisha yait? ¿Warinia túrait?” tímiayi. ³⁴ Túrasha aencha untsurí chichaman untsummiarmiayi. Túmainiakui kapitiáncha penké nekaachmiayi. Tuma asamtai Páprunka suntar pujamunam júkiarmiayi. ³⁵ Tura suntar pujamunam wáitiniam jeawar Páprun entsaki júkiarmiayi aents imiá kajerainia asamtai. ³⁶ Tura aencha ukunmaani pataakar, mantamnátí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitiánin Kriaku chichamj̄ai chichaak “Wi ishichik chichasaintjame” tímiayi.

Tutai kapitián chichaak “Warí, ¿amesha Kriaku chicham chichastin nékamek? tímiayi. ³⁸ Nuñkia amesha ¿Ejiptunmayā shuárchakaitiam? ¿Nuik kua-tru mir (4000) aents, man̄kartin tutai atsamunam yaruakchamkam? ¿Kapitiánj̄ai meset najanataj tusa túrachmakum?” tímiayi.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nun̄kanam uunt pepru Tarsu náartin ana nuj̄ akiiniaitjai. Tura wait-neasam j̄u aents chichastin tsan̄katrukta” tímiayi.

40 Tura kapitián, ayu, tutai, Papru watainium wajas, mitiat pujustarum tusa uwején takuimi-ayi. Tura aents itiatkarmatai Israer-chichamjaj chichasmiayi.

22

Papru áentsun timia nu

1 Papru chichaak juna tímiayi: “Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan titiatjana nu waitneasrum anturtuktarum” tímiayi. 2 Tura Papru Israer chichaman chichaakui, aents nuna antukar nú nan̄kaamas itiatkarmiayi. 3 Nuĭ Papru chichaak “Wikia Israer-shuaraitjai. Tarsu pepru Sirisia nun̄kanam ana nuĭ akiiniaitjai. Túmaitatnak juĭ Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamáí túrarmena nuna wisha nútiksanak Yusna ana nuna tuke enentáijjaj wakerukuitjai. 4 Tura Jesusan umirkaru ármia nuna máataj tusan pataatukni wekaimiajai. Túran áishman̄kan nuwan̄cha achikian sepunam en̄keataj tusan túrimiajai. 5 Israer-patri uuntrisha Israer-shuara uuntrisha Tamaskunam í-shuar susatá tusar papin ataktusar akuptukarmia nuna niñkia nékainiawai. Jesusan umirkarun achikia ikiaankan juĭ Jerusarénum asutniáwarat tusan werimjai’ tímiayi.

(Túramuri 9.1-19; 26.12-18)

6 ‘Tura wi jintiá wéaj Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi. 7 Túrunamtai wisha nunká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiai.

8 Takui wi aniasmajai “¿Amesha yáitiam, Uunta?”

Tutai “Wikia Nasarétnumiá Jesusaitjai. Ame pataaturmena núitjai” turutmiai.

9 Wijiaj pujuarmia nu, newaat wajantun wáinkiar ti ashankarmai. Túrasha ninikia túrutun antukcharmai. 10 Tura wi tímiajai “¿Nuinikia, Uunta, warí itiurkattaj?” tímiajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmiai, tímiaji. 11 Kame wikia nú newaat ajakun ísan jiru kusurmai. Tuma asantai winia tsaniakmar enkeki jurukiar Tamaskunam ejetiarmai’ tímiaji.

12 Papru tuke aujmatki wéawai. ‘Tura nuj Tamaskunam áishman Ananías pujumai. Niisha Yúsan aneak, Muisais akupkamia nuna umirkauyi. Tura nú péprunmaya Israer-shuar ármia nu nin pénker enentáimtiarmiai. 13 Nú Ananías winia írsataj tusa támai. Taa turutmai “Yatsuru Sauru, pénker iimtia.” Túrutkui nú chichamaik pénker íimmiajai. Túrunan Ananíasnasha wáinkiamjai. 14 Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarincha nuna, ísat tusa, winia chichampruncha antukat tusa ámin yaunchu Yus anaitiamkaiti. 15 Amesha Papru, Yusna ana nu ísumna nusha antukumna

nusha ashí aents ujakartatme. ¹⁶ Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷ “Tura Jerusaréñnum waketkin Yusa Uunt Jeen wémajai Yúsan áujsataj tusan. Nuí íimiarmajai. ¹⁸ Nuí Jesus chichartak “Juí Jerusaréñnum Wíi túramur etserkattamna nuna antukchartatui. Tuma asamtai warí jínkim wetá” turutmiai.’

¹⁹ “Túrutkui wi tímiajai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuí matsatun achikian awatin sepunam enkeawarmia nuna nékainiawai. ²⁰ Tura nuyá Áminiu etserniun Estepañkan máiniakuisha wisha wajamjai. Túruiniakui, “pénkeraiti” tímiajai. Nú arantcha ni pushirín íirsamjai” tímiajai.’

²¹ “Túrasha Uunt Jesus winia turutmai “Wetá. Israer-shuarcha matsatania nuí akupkatjame” turutmai” tímiayi Papru.

Suntara kapitíántriin túrunamia nu

²² Nuí matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi.

²³ Tura aentska Paprun kajerainiak, ti untsumainiak pushirín tujaat ajapawar nuñkancha nanñkimkiamaikia ajarmiayi. ²⁴ Tura kapitíán nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. ²⁵ Tura Páprun asutiátai tusar jinñkiárar awajsam Pápruka kapitíánin chicharuk

“¿Rúmanmaya aents áyatik asutiámniakait, ni túramurj nekartsuk?” tímiayi.

26 Nuna táman antuk kapitiáncha uunt kapitiánin ujaktaj tusa werí chichaak “Maaj, túrataj tamena nu anearta. Ju áishman Rúmanam pachitkaiti” tímiayi.

27 Nuna antuk uunt kapitián Páprun werí aniasmiayi “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

28 Tutai “Wikia ti kuítian akikmakmiajai Rúmanam pachiinkiatniun” uunt kapitián tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiiniaitjai” tímiayi.

29 Nuna takui Páprun asutiátaj tiarmia nuna wárik iniaisar jíniar wearmiayi. Tura imia uunt kapitiáncha Rúmanam pachitkian jin_kiá asa ashankamiayi.

30 Tuma asa kashin tsawar uunt kapitián, urukamtaik Páprun imiá kajerainia, nekaataj tusa wakerak Paprun werí jin_kiámun atirmiayi. Tura Israer-patrj uuntrjn chíkich naamka armia nújaisha ikiaankamiayi. Tura nuin_kia ni matsatmanum Páprun itiar ajapén awajsamiayi.

23

Israer-aentsu Úuntrjn Papru timiania nu

¹ Papru Israer-patrj naamkarjn úmamkes iis “Wíi shuartiram antuktarum. Úchichik tuke yamaisha Yus íimmianum péñker wekainuitjai” tímiayi.

² Papru nuna takui Israer-patri uuntri Ananías, ni suntarın Papruı ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiará chichamtinia íimiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuınkia urukamtia Muisais tímia nuka iniaisam ame suntarum winia asutiátarum tame?” tímiayi.

⁴ Tura nuna takui nuı wajarmia nu Páprun tiarmiayi “¿Maaj, amesha Patri uuntri imiá yajauchisha chichaream?”

⁵ Tutai Papru tímiayi “Yatsuru, wisha Patri uuntri áutskaitia tíchamjai. Nékaitkiunka núnaka tíchaajai. Kame wisha nékajai, Yus-Chichamnum tawai “Atumı uuntri yajauch chicharkairap” tawai” tímiayi.

⁶⁻⁸ Israer-aentsu úuntriya jimiará írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmayá nantaktincha Yusa suntarışha aentsu wakanışha tura iwianchcha atsawai, tiniu ármiai. Antsu Pariséu aentska, nuka ashı awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wıi shuarsha Pariséu áiniawai. Wikia ashı shuar jakamunmayá ukunam nantaktin átatui tu jintiamun, nekaatai tusar itiariarmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasaraı nusháa nusháa enentáimprarmiayi.

⁹ Nuınkia ashı aents charaatum ajarmiayi. Tura Israer-shuara jintinniuri Pariséunam írutka armia

nu wajakiar tiarmiayi “Ju áishman tunaan penké túrichuiti. Yusa suntari chíkich wakancha nin nekas chichaschamashi. ¿Ya neka?” tiarmiayi. ¹⁰ Ti charaatum ajainiakui suntara kapitiántri Páprun achiarchartimpiash tusa suntaran untsuk, “Jiiktiarum, túrarum suntar pujamunam awayátarum” tímiayi. ¹¹ Nuyá kashi Papru Uuntri mesekra ipiatuk “Kakaram ajasta, Papru. Jui Jerusarénum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yuminkramu atai” tiarmiayi. ¹³ Nuna tiarmia nuka kuarenta (40) nankaamas ármiayi. ¹⁴ Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustatji. Máachrikia yajauchiniam yuminkramu atai” taji. ¹⁵ Tuma asamtai ashí Israer-patri naamkarijjai suntara kapitiántri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar ninikia táatsain náaktatji” tiarmiayi.

¹⁶ Tura Papru awe nú chichaman antuk suntar pujamunam taa Páprun ujakmiayi. ¹⁷ Tuma asamtai Pápruka suntara kapitiántrin untsuk “Ju uchi uunt kapitiánnum jukitia. Niisha chichaman takakui” tímiayi.

18 Kapitiáncha uchin uunt kapitiánnum ejé tímiayi “Papru enkeamu pujana nu winia untsurak “Ju uchi uunt kapitiánnum jukitia. Chichaman takakui” túrutui” tímiayi.

19 Uunt kapitiáncha nú uchin enkeki arantach jukí chicharuk “¿Warí turuttiaj tame?” tímiayi.

20 Tutai uchi tímiayi “Israer-aents Páprun chichaman jurusarai. “Papru túramuri ti paant nekaatai tusar kashin Israer-shuara uuntriin ejetarum” turamartatui. 21 Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumsuk tura úmutsuk matsamsattaji” tuiniawai. Tuma asamtai yamaisha ámin titi tusa nákarmainiawai” tímiayi uchi.

22 Tura uunt kapitiáncha uchin chicharuk “Ame túrutmena nu chíkich aents penké ujakaraip’ tímiayi. Nuna tj, uchin akupkamiayi.

Akupin Piriksai ejetiarmiania nu

23 Nuyanka uunt kapitiáncha chíkich kapitiánin jímíaran itiá chichaak “Urum, kashi ajapén ajatatuk aj, untsurí suntar ikiaankarta. Jímíará sián (200) aya náwek, setenta (70) kawainium eketka, nuyá chíkich jímíará sián (200) nánkijiaín Sesaria nunkanam wétin iwiarata. 24 Páprusha kawainium ekemkatin iwiarturta. Túrarum penkerak ejetarum akupin Piriksai” tímiayi. 25 Tura niijiai ju chichaman áatrar akuptukmiayi:

26 “Ti penker akupin Píriks, wikia Krautiu Rísias ju papin áatjame. 27 Israer-aents ju áishmankan maatai tusar wakeruiniak achikiarmiayi. Tura niisha Rúmanmaya áentsuitkui wikia

nuna nekaan suntarjai werin jukimjai.
²⁸ Wikia ¿urukamtaik achikiaruit? tusan
 Israer-patri naamkarin jukimjai nin.
²⁹ Páprunka ii uuntri akupkamurin umiatsui
 tusar nin kajeriarmiayi. Pápruka yajauch
 túrachu asa mantamnachminiuyayi.
 Sepunmasha enkemachminiuyayi.
³⁰ Tura wisha Israer-aents nin máatniun
 chichaman jurusman nekaan amiin
 akuptajme. Nuyasha nin kajerainia
 nunasha tajai “Atumsha Piriksai werum
 átum warinma kajerarum nu títiarum”
 tajai. Ayu. Júchiniak tájame.” Nuna tu
 áatar akuptukmiayi.

³¹ Tura suntarsha ni uunt kapitiántri tímia
 nútiksaran Páprun kashi júkiarmiayi Antipatris
 péprunam. ³² Kashin tsawarar suntar aya náwek
 wearmia nuka waketrarmiayi. Tura kawainium
 eketrainiaka Páprujai wearmiayi. ³³ Sesaria
 péprunam jeawar papin Piriksan súsarmiayi. Tura
 Pápruncha nuji ejeniarmiayi.

³⁴ Akupniusha papí aujsua amik Páprun anias-
 miayi “Amesha, ¿tuí akiiniaitiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajer-
 tamainia nu taar turamainiakui anturkatjame”
 tímiayi. Tura nuyanka uunt akupin Erutisa jeen
 awayá apujsamiayi, suntar ísarat tusa.

24

Papru Píriksjai áujmatsamiania nu

1 Tura senku tsawant nankaamasaj Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujaj táarmiayi. Ju aents Páprun kajerainia ásar akupniunam wearmiayi. 2 Nuj Páprun itiarmatai Térturu chichatan juármiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. 3 Tuma asakmin iisha ashí matsatmanum tuke tsawant ti shiir yumiṣsamajme, uunta. 4 Tura amesha ti núkap chicham antuktin nakitiatspash. Tuma asamtaí antsu ishichik waitneasam anturtukta, tímiayi. 5 Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úuntriinti. 6 Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujaj métek asutiátai tusar wakerimji. 7 Túrarin nuyanka kapitián Rísias taa tapit achik jurutramkimijai. 8 Tura atumek akupin Piriksaj werum nuj aujmatkatarum, turamaji, tímiayi. Tuma asamtaí amesha Píriks, Papru aniasta. Nuin kia ii tájinia nu nekasaiti, nu nekaattame” tímiayi Térturu.

9 Tura Israer-aents pujuarmia nu “Nekasaiti ashí ni tana nu” tiarmiayi.

10 Nuyá Píriks, uwejejaj, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsurí uwitin pujusuitme. Tuma asamtaí nuikia shiir enentáimsan páchitsuk chichastatjai. 11 Wats,

wi túramur nekartuata. Yúsan áuj^sataj tusan Jerusaréⁿnum wi wémajna nu tuse (12) tsawant nan^kaamasai. ¹² Nuⁱsha yajauch áuj^matki weaⁱ wáitkiacharmai. Yusa Uunt Je^encha tura Israer-shuara aujtai je^encha tura pepru jíntianmasha áentsnum charáa charáa ajá wekaaⁱ pen^ké wáitkiacharmai, tímiayi. ¹³ Ju aents juⁱ matsatainia nu wíniaka pen^ké turutchamnia áiniawai. ¹⁴ Tú^rasha juⁿa paant ujaajme. Jesus yamarman jintíana nuna umíajai. Kame Israer-aentska wáitai^ti tuinia nuna wikia umíajai. Tú^rasha nuna tú^ran ii uuntri^r Yusri akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiaitjai. ¹⁵ Tura jakaasha nantaktin átatui, tajai. Warí, péⁿker aents nútiksáⁿ yajauch aencha nantakiartatui imia Israer-shuar tuiniatsuk. Tura wisha nútiksának túrunatniuiti tajai. ¹⁶ Tura wisha tiniu asan, wikia winia enentáirui Yus ímmianum makuumatsuk wekasataj tajai. Tura áentsnumsha nútiksának pen^ké makuumatsuk wekaajai' tímiayi.

¹⁷ 'Tura, uunta, untsurí uwitin chíkich chíkich nun^kanam wekaasuan amikian winia shuarui támajai. Kuítrínchan kuítian susataj tusan tura Yusa kuítríncha nin susataj tusan támajai.

¹⁸ Tú^ran wisha, Muisais jintinmia nútiksának nijiaamaran, Yusa Uunt Je^en pujumiajai. Untsurí aents charaatum ajainiasha atsumiayi. Nuⁱ

wiki pujáⁱ Ásianmaya Israer-aents wáitkiarmiayi.

¹⁹ Tura wi yajauch túraitkuⁱnkia winia wáitkiarainia nu táchatniukait ámin ujatmaktasa.

²⁰ Tú^rachkuⁱnkia juⁱ pujuinia nu, Israer-patri

naamkar_i matsatmanum wi pujumajna nu_i yajauch túramun nékainiakka turutiarti. ²¹ Kame, ““jakamunmaya nantakminiaiti” tau asantai makuurtiajtsarum pujarme” matsatmanum tímiaj nu_{jai} turutchartimpiash. Nú arantka yajauch túramun pen_{ké} nekartuacharmai” tímiayi Papru.

²² Táman antuk Píríks, Kristu shuar_i túramun paant nekáa, áanik iniaisamiayi. “Antsu kapitíán Risias támatái nu_inkia nu chichaman nekaatjai” tímiayi. ²³ Tura nuyá suntara kapitíántr_in chichaak “Ju Pápruka tuke emetnati. Tura ishichkikia an_{kant} apujtsatarum. Tura nuyá ni amikr_i taa yáin_{taj} takui suritkiairap” tímiayi.

²⁴ Tura nuyá chíkich tsawantaj_i ataksha Píríks ni nuwe_{jai} Tursiraj_i támiayi. Núwenka Israer-shuarauyayi. Píríkska “Papru itiatarum’ tímiayi. Papru Jesukrístunun étserkui antimiai_i. ²⁵ Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Píríkska ashamak tímiayi “Antsu yamaikia máakete. Tura ataksha wi an_{kant} pujakun untsukmijiam” tímiayi. ²⁶ Tura, an_{kant} ajastaj tusa Papru kuítian akirkashtimpiash, tu enentáimias, Píríks tuke untsúu wémiayi, chichastai tusa. ²⁷ Tura nuyanka jimiará uwí nan_{ka}asmatai Píríks akupin náamkamu ajapnamiayi. Tura chíkich aents, ni naari_i Pursiu Jistu akupin náamkamiayi. Tura Píríkska, Israer-aents pen_{ker} enentáimtursarat tusa wakerak, Páprun sepunam tuke ikiukmiayi.

25

Papru Jístuj_i áujmatsamiania nu

¹ Jístusha akupkatin takatan nan̄kaamataj tusa Sesaria péprunam támiayi. Tura menaintiú tsawant nan̄kaamasmatai nuyá we Jerusaréñnum jeamiayi. ² Nuisha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi. ³ Tura tiarmiayi “Waitneasam Páprusha Jerusaréñnum akupkata” tiarmiayi. Jintia maatai tusar wakeruiniak nuna tiarmiayi.

⁴ Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nūi wárik waketkittiajai” tímiayi. ⁵ Nuyá nin tímiayi “Atumsha penkeri árumna nu, wijjai Sesianam wétiniaitrume. Tura nú áishmañka tunaari ákuñkia nuisha títiniaitrume” tímiayi.

⁶ Jístuka Jerusaréñnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesianam waketkimiayi. Tura nūi jeá kashin tsawar, akupin pujutainium pujus “Papru itiatarum” tímiayi. ⁷ Tura Papru wayamtai, Israer-aents Jerusaréñnumia taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmiayi. Túrasha penké uyumamtikiacharmiayi.

⁸ Pápruka chichamprumak tímiayi “Wisha tunaan penké túrachuitjai. Israera uuntri áarmaríncha umirkaruitjai. Tura Yusa Uunt Jeencha yajauch awajsachuitjai. Tura uunt kapitíanniasha yajauch penké chicharkachuitjai” tímiayi.

⁹ Jístuka Israer-aents penker enentáimtursarat tusa wakerak, Páprun tímiayi “Wakerakmiñkia

Jerusarénum wemí. Wisha nuí ame túramurmin nekaatjai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. ¹¹ Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuinkia wíniaka Israer-shuarnum surunkachminiaitjai tajai. Tuma asamtai seajme, wí túramun uunt akupin Sésar nekartuati” tímiayi.

¹² Tutai, nuyá ni írutramurijiai chichasua amik, Jistu Páprun tímiayi “Uunt akupniui wétaj tusam seame. Tuma asamtai nuí wétatme” tímiayi.

Papru uunt akupniujai áujmatsamiania nu

¹³ Tura ishichik tsawant nankaamasmatai akupin Akripia ni nuwejai Pírinísejai Jístun áujsatat tusa Sesarianam wearmiayi. ¹⁴ Tura untsuri tsawant pujusarmiayi. Tura nuí pujuiniaj Jístuka Papru túrunamun akupniun ujaak tímiayi “Juí áishman pujawai. Píriks nin achik enkea ikiukmiayi, tímiayi. ¹⁵ Kame wikia Jerusarénum pujái Israer-patri uuntri tura Israer-aentsu úntrisha, Papru yajauchin túraiti tusar káutrukarmiayi, tímiayi. Mantamnati tusam akupkata, tu seattiarimiayi. ¹⁶ Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsain mantamnati tusar akupeatsji iisha” tímiajai. ¹⁷ Tiniu asan, táarmatai, wikia nákatsuk kashin tsawaran akupin

pujutainium pujusan, Papru itiatarum tusan akupkamjai. ¹⁸ Tura Páprun tsanumprurtai tusar taar chichainiaksha, wi enentáimmiajna núnaka tícharmiayi. ¹⁹ Antsu áyatik Yus umirkar túmatair_{in} Papru nuna túrachai, tiarmiayi. Tura nuyasha áishman_n Jesus naartin nantaki iwiaakui tawai Pápruka, tiarmiayi. Nunak tiarmiayi. ²⁰ Tura wikia nú chichaman túratniun nékachu asan, Páprun aniasmajai “¿Amesha Jerusaré_nnum wétaj tusam wakeramek? Nui nu chichaman nekartamawarti” tímiajai. ²¹ Túrasha “Atsá. Ju_{in} pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuinkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

²² Nuyá Akripia chichaak “Wisha itiursanak nu áishman_n chichaamun anturkaj” tímiayi. Tutai Jistu tímiayi “Amesha kashinkia anturkattame”.

²³ Tura kashin tsawar Akripia Pirinésejai taar, iwiaa-iwiarmamu ajas wayawarmiaiyi. Suntara úntrijia_i tura nú péprunmaya úntrijia_i wayawarmiaiyi. Tura nui Jistu, “Papru itiatarum” tímiayi.

²⁴ Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman_n íistarum. Ti untsurí Israer-aents Jerusaré_nnumsha tura juí Sesarianmasha ju áishman_nkan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai.

²⁵ Túrasha wíjia_{in}kia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai.

²⁶ Tura wariniak uunt akupniun áatrataj nuna

nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. ²⁷ Warí wisha, ni yajauch túramurin áattsuk, uunt akupniunam akupkashtiniaitjai” tímiayi.

26

Papru Akripiaj chichamprumakmiania nu

¹ Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. ²⁻³ Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairin ujakmiania nu

⁴ ‘Wi úchichik winia nunkarui tura Jerusarénumsha pujusan wi túramajna nuna ashí wíi aents Israer ainia nu nékainiawai. ⁵ Pariséu ajasan, ni akupeamurin itiurchat ain ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. ⁶ Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷ Tura ashí mash Israer-shuarti, tuse (12) aents matsatka ájnia nu, ju nantaktin chichaman Yus tímia nuna túrunati tuser nákainiaji. Tuma asar Yus áujkuri,

tsawaisha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia. ⁸ Warí, atumsha “Yus jakancha iniantkimniaiti” tátsurmek’ tímiai.

⁹ ‘Tura wisha yáunchuka Nasarénumia Jesusnan umirkaruka kajerkatniuiti, tu enentáimniuyajai. ¹⁰ Tura Jerusarénum Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia pénkeraiti tu wémiajai. ¹¹ Tura Israer-shuara iruntai jeen wayan ti asutiármiajai, Jesusnan umirkatniun iniaisarat tusan. Tura imiá kajerkaran chíkich nunkanmasha pataatu wearmiajai achiktaj tusan’ tímiai.

*Tamasku jintianam túrunamun ujakmiania nu
(Túramuri 9.1-19; 22.6-16)*

¹² ‘Tura Israer-patri uuntri tsankatrukmetai, papin ni surusarmia nujai, Tamasku péprunam wétaj tusan jíinkimiajai. ¹³ Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantruramiai. Tura wijai wearmia nunasha núnisaran etsantrurarmiayí. ¹⁴ Tura túrunamtai ashí nunká tepetar wáinkiarmiajai. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname” turutmai.’

¹⁵ ‘Túrutkui wisha “¿Amesha yáitiam, Uunta?” tímiai.

Tutai Uunt turutmai “Wisha Jesusaitjai, ame pataatamna nútjai. ¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai. ¹⁷ Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. ¹⁸ Péñker jintintiata tusan akupeajme. Kame aencha kiritniumiã jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarín tsankurattajai. Nuna túran Yusna ajasaru áiniana nujái apujsattajai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹ “Tuma asamtai, uunt Akripia, Uunt Jesus nayaimpinmaya wantintiurak turutmia nuna umirkataj tusan pujajai. ²⁰ Enentai yapajiáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusaréñnumiãñ, Jutía nuñkanmayãñcha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiajai ashí shuaran. ²¹ Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péjchach ainia nunasha

ujainiajai. Tura Muisaissha, Yúsnan etserniusha tiarmia nunak étsereajai. Nú arantka tátsujai. ²³ Krístuka wáitsatniuyayi, tura jakasha émak nantaktiniuyayi, ii uuntri tiniu ármiai. Tura Krístuka nantaki Yusa chichamen íi áentsun tura Israer-shuarchancha nútiksān ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

Papru Akripian Yus-shuar awajsataj tusa wak-erimiania nu

²⁴ Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

²⁵ Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti. ²⁶ Wi tájana nuna, uunt Akripia jui pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

²⁷ Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

²⁸ Takui Akripia chichaak “Maaj, ishichik awaj-tame Papru, Yus-shuar ajastin” tímiayi.

²⁹ Tutai Papru tímiayi “Tura ishichik chichamjaisha untsurí chichamjaisha, amesha uunt Akripia, tura ashí winia anturtukurmena nu, wijiái métek ajasúk tusan wakerajai. Tura antsu wiá núnisan jin_kiámua núnaka wakeratsjai” tímiayi.

³⁰ Papru nuna tuasua amikmatai akupniusha, uunt kapitiáncha, Pirinísesha, tura nuí ashí pujuarmia nu wajakiarmiayi. ³¹ Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkeshá sepunmasha enkeachminiati” tiarmiayi.

³² Tura Akripia Jístun tímiayi “Ju áishman “uunt akupin nekarati” tíchaitkuínkia akupmai makuitji” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitiántrijiai nenakar akupkarmiayi. Nú kapitiáni naari Júriuiti. ² Tura Atramitiunmaya kanu Asia nunkanam pepru ármia nuí wétasa pujumia nu enkemprarmiaji. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. ³ Nuí enkemprar kashin tsawarar Sitiun péprunam jeamiaji. Nuí jeawakrin kapitián Juriu, Páprun waitnentak tímiayi “Ame amikrumiin wetá. Au írmasarti” tímiayi. ⁴ Tura Sitiunnumia jíinkir, kanujai wesar nase tukumpramprakrin Chipri núnkaka menanmaani aa ikiukmiaji. ⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam

jeamiaji. Nuka Risia nun_{kan}maiti. ⁶ Nui_{je}ar nú kanu ikiukmiaji tura chíkich kanu Arijiántrianmaya taa Itiaria nun_{kan}nam wétasa pujumiayi. Nú kanunam suntara kapitiántri, en_{ke}mpratarum, turammiaji. ⁷ Tura untsurí tsawant yáitmataik we-wémiaji tura ti wiántkar Nítiunam jeastatuk ajasmiaji. Tura nu_{ish}a nase tuke tukumkarta asamtai Sarmun_u nun_{kan}nam ayamchik nan_{ka}amakir, Kritia nun_{kan}nam áawinini ayamchik wémiaji. ⁸ Tura Kritia nun_{kan}nam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjuchiiti. ⁹ Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. ¹⁰ Tura Papru chicharuk “Amikru antuktarum. Wi nékajai, yamaí wéakria ti tsúumainti. Kanusha tura káarak kanunam en_{ke}tainia nusha men_{kar}attawai. Tura iisha núnisrik kajin_{cha}tjiash” tímiayi. ¹¹ Suntara kapitiántrinka Páprunka anturtsuk, kanú wianniur_{in} kapitiántr_{in}cha tura kanú kapitiántr_{in}cha chichamen anturkarmiaji. ¹² Tura nu_{je} Shiir Pujutai tutainium yumitin pujustin pé_nkerchaitkui “Nu_{in}kia juy_aka wéartai. Pinise péprunam jeamainchuashit” ashí tiarmiayi. Nú péprusha Kritia nun_{kan}nam nayaants ayamach pujawai. Nú péprunam yumitin pujustinian wakeriarmiayi, arakia nun_{ka}ani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nun_{ka}ania tápiriri ajakui, ii wétin yamaikia pé_nkeraiti, tu

enentáimsarmiayi. Túmakui kanu emetai jiru júusar jíinkir Krítianam ayamchik wearmiaji. ¹⁴ Túrasha árusan arakia kakaram nase, Nuristi tuinia nu tukumpramiayi. ¹⁵ Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. ¹⁶ Tura Kritia nunkanam áawinini nankaamakur nuinka nase ishichik mijiantmatai, uchich kanu japikir wémiaj nu ti takasar uunt kanunam enkermiaji. ¹⁷ Tura enkerar chapikjai uunt kanun jinkiáarmiaji wewe najanatai tusar. Tura náikim mukutniunam, Serti tutainium nase juramkishtajash tusar, kanunam yakí tarach aan itiararmiaji. Nu tarach nase útsuktin tusar nenarma ármiaji. Túrawar áyatik nase juramkitiai, tiarmiaji. ¹⁸ Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiaji. ¹⁹ Menaintiú tsawant nankaamasmatai iisha ii uwejéjain kanunam káarak iruniarmia nusha entsá utsankarmiaji. ²⁰ Tura untsurí tsawant tsawai sha etsantrachmiaji tura káshisha yaasha tsaparcharmiaji. Tura nasesha ti kakantar tukumpramkurin “Yamaikia uwempratin atsawai” tiarmiaji. ²¹ Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Krítianmayanka jíintsuk anturtukuitkiurminkia yamá ju iturchatnum pujutsuk tura emenkatmatsuk pujuaji’ tímiayi.’

²²⁻²⁴ ‘Yamá kashi winia Yusru suntari nayaimp-inmaya wantintiurkayi. Nú Yúsan umirkaitjiana nu akupturkayi. Tura nu taruti “Ashamkaipia Pa-

pru, turutui. Amesha Ruma péprunam uunt akupniunam jeattame. Tura chikichnasha ámijiai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwempratarme. Túrasha kánuka mesertatui. ²⁵Wisha winia Yúsrún nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum. ²⁶Tura chíchimisha nunka uchich pújakmanum nui patatmittiaji” tímiayi.

²⁷Ayu, katurse (14) tsawant nankaasmatai nú kashi Atria nayaantsanam jeamiaji. Nui nase nánkamas juram wémiaji. Nuyanka kashi ajapén wiantin armia nu nunka ámunam jeeteman nekaawarmiaji. ²⁸Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemsan ataksha nekapmamiayi. Nuinkia painti siati (27) mítru nekapmamiayi. Tuma asa nunká anumsatuk ajasun nekaawarmiaji. ²⁹Tura kayanam ijiukajai tusar ashamainiak kuaru jirun kijinian chapikjai kanú senkarin jinkiáwar entsá ajunkarmiaji. Kijin asamtai, inít tepeámtai nase juramkichmi tusar túrawarmiaji. Tura wake mesekar, tsawarti tusar matsamarmiaji.

³⁰Tura matsatainiaj wiantin armia nu, iikia uchich kanunam enkemprar pisarchatjiash tu enentáimsarmiaji. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiaji. ³¹Tura tuma wáiniak Papru suntara kapitíántrín tura ni suntaríncha ujakmiaji. “Ausha uunt kanunman enketainiachkuinkia atumsha

uwemprashtatrumé” tímiayi. ³² Tutai suntarsha uchich kanú chapikrĭn tsupirkar entsá ajun̄karmiayi.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yumĩnsamiayi ashí íimmianumañ. Tura puuk yuamiayi. ³⁶ Tura apatkun yuan wáinkiar, ashí aents shiir enentáimsar yurumáwarmiayi. ³⁷ Nusha ashí aents irurmaka jimiara siñ̄ nuyá ataksha setenta sais (276) ármiai. ³⁸ Yurumáwar ejemakar, yurumkanka entsá utsan̄karmiayi, uunt kanu wampú ajasat tusar.

Kanu pen̄ké mesermiania nu

³⁹ Tura tsawarmatai wiantin armia nu, nuñkan nekaacharmiayi. Túrasha én̄kentamunam káanmatak aan wáinkiar “Ai kanu anuntai” tiarmiayi. ⁴⁰ Nuyá jiru entsá ajun̄man chapikrĭn tsupirkar entsá ikiukiarmiayi. Tura kanait jin̄kiárma ármia nuna chapikrĭn tsupirkarmiayi. Tura tarach kanú nujiin̄ amia nuna nenakarmiayi. Túram kanu káanmatkanam anumsatuk ajasmiai. ⁴¹ Tura wainchi jímiar ámunam jeá kanu entsá wayá tepeamiayi. Tura kanú sen̄kariñkia chíchimi yakí takuir ajíamu asa kupintramiayi. ⁴² Suntarsha, achik júamu armia nú shuaran máataj tusa

wakeriarmiayi, yukuak pisararain tusar. ⁴³ Tura kapitiáncha Páprun uwentikrataj tau asa nuna túratniun tsankatkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi. ⁴⁴ Nuyá chíkichkia kanunmaya numi, kame nánkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiayi.

28

Marta nunkanam túrunamia nu

¹ Tura ashí iwiaakuk jíintrar, nu nunka Marta naartin nekaamiaji. ² Tura nuj matsamin armia nu, shiir awajtamsarmiaji. Tuma asantai iisha tsetsema asakrin, tura yumisha yútakui, uunt jinia ikiapárrarmiayi. Tura “anamaitiarum” turammaji. ³ Pápruka jinia kukarun ikiaanank jinium pataamiayi. Túmawaj napi tsuéran ashamak jiinki, Papru uwején nemaramiayi. ⁴ Tura nú nunkanmaya aents, Papru uwején napi nemaran wáinkiar “Ju áishmansha shuáran maichuashit, tiarmiayi. Nayaantsanmaya uwempraitiatan ni yusrí iwiaaku átinian suritiawai” tiarmiayi. ⁵ Páprusha ni uwején pear napin jinium awanmiayi. Tura penkesha yajauch ajaschamiayi. ⁶ Tura niisha eáchatpiash tusar ii pujuarmiayi. “Túmatskesha jaka inianchatpiash” tiarmiayi. Túrasha ti núkap pujussha penké najaweachmiayi. Túrunamtai, nuínkia nusháa enentáimprar “Pápruka yúschashit” tiarmiayi.

⁷ Nú nunkanam aentsu penkeri ámiayi ni naari Pupriu. Nú Pupriu ni jeen in itiaarmamiaji. Tura

menaintiú tsawant yurumkancha suramsarmiaji.
⁸ Tura nuĭ pujarin Pupriu aparĭ tsuer, numpajai
 ijiarki jáamiayi. Túmakui Papru werĭ iyumiayi.
 Tura Yúsan áujtus amik uwején nin awantkami-
 ayi. Túram péñker ajasmiayi. ⁹ Nu túramun
 nekaawar, nú nunĕkanmaya aents jaa armia nu
 tariar, niisha péñker ajasarmiaji. ¹⁰ Túram incha
 ti shiir enentáimturmasar núkap ajampramsamiaji.
 Túram ukunam ii wétin jeamtai ashĭ ii atsumamun
 suramsarmiaji.

Rúmanam jeawarmiania nu

¹¹ Ii wétsuk nú nunĕkanam menaintiú nantu
 pujusmiaji. Tura nuyá chíkich kanunam
 enĕkempramiaji. Nu kanusha Arijiántrianmaya
 yaunchu tau menaintiú nantu yumi yútakui nuĭ
 pujumiayi. Nú kanu nuĭĭin numi-yus najankamu
 jímiar ekemiarmiayi, ni náarinĕkia Kástur tura
 Púruks. ¹² Iisha nuĭ enĕkemprar weri Serakúsa
 péprunam jeamiaji. Nuĭ menaintiú tsawant
 pujusarmiaji. ¹³ Tura jíinkir nuyañka nayaantsa
 ayamach weri Riju péprunam jeamiaji. Nuĭ
 kanarmiaji. Tura kashin anariā nase suut
 umpuuntĭ támiayi. Tuma asamtai nú kashinkia
 Putiuri péprunam jeamiaji. ¹⁴ Nuĭ jeawakrin
 Yus-shuar pujuarmia nu, ni jeen juramkimiaji.
 Tuma asamtai nuĭn chikichkĭ tuminĭn pujusmiaji.
 Tura nuyañka nunĕkan Rúmanmaani wémiaji.
¹⁵ Tura Rúmanmaya Yus-shuar, ii jeatniurĭn neka
 ásar jintiá inĕiunmaktai tusar winiarmiayi.
 Chíkichkia Apiu pepru támanum táarmiayi, tura
 chíkichkia, Menaintiu Jeā tutainium táarmiayi.

Nuna káunkan wáiniak Papru shiir enentáimias Yúsan yuminsamiayi.

¹⁶ Tura ii Rúmanam jeawakrin kapitián Juriu achikia yarumman Rúmanmaya uunt kapitiánin ejetimiayi. Túrasha, Pápruka jea ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nankaamasmatai Pápruka Rúmanmaya Israer-aentsu penkerin untsuk ikiaanak “Yatsurtiram antuktarum, Wisha Israer-áentsun yajauchin penké túrachmiajai. Tura ii uuntrj akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiayi. ¹⁸ Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtai. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wí shuara tunaarin kapitiánin ujaktinian táchaitjai. ²⁰ Tuma asamtai, yatsurtirmin, atumin untsukjarme chichastaj tusan. Yusa anaikiamurj, Israer-shuarti nákaunia nu táwiti wi tu étserkui, jui achikiar jinkiámu pujajai” tímiayi Papru.

²¹ Tutai niisha tiarmiayi “Isha Jutía nunkanmaya aentsti, ame yajauch túramu papí penké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji.

²² Túrasha ashí nunkanam yamaram chichaman jintinian yajauch chicharainiawai tama antukji.

Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantaj iruntrami tiarmia nú tsawant jeamtai, ti untsurj aents Papru pujamunam iruntrarmiayi. Papru jintintiainiak Muisais yaunchu aar akupkama nujaj tura chíkich Yúsnan etserniu aarmarijjaisha, Jesus nekas Yusa Anaikiamurinti tusa paant jintintiwarmiayi. Nuna tura káshik nankaama Yus akupeamunam pachiinkiatniun étse-étserkua kjaraj iniaisamiayi.

²⁴ Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiayi.

²⁵ Chikichkí enentaik' enentáimsatin atsá asamtai, jiinki weartasa pujuarmiayi. Túmainiakui Papru chichaak “Nékasen Yusa Wakanj yaunchu Yúsnan etserniu, Isayas naartin áarmarijjaj ii úuntrin chicharuk juna tímiayi:

²⁶ “Ame weme au aents ju titia:

“Ántutka ántakrumsha nekaashtatrume,
Íitkia iyakrumsha wáinkiashtatrume.

²⁷ Warí, au shuara enentáj katsuarai;

Kuishijjaj ántaksha ántichua núnin áiniawai,

Jiisha epetkamua áanin áiniawai,

Iyaksha wáinkiajn tusa, ántaksha antukajn tusa

Enentáimkiusha nekaawajn tusa,

Winí uwemprajn tusa, tura Winí tsuamarajn tusa túrunayi”.

Nuní áarmaiti. ²⁸ Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura ninikia nekas umikiar-tatui” tímiayi. ²⁹ Tura Papru nuna tj iniaisam-

tai Israer-shuar nuamtak núkap chicharnaiyasua wearmiayi.

³⁰ Tura Pápruka nuin jea ikiamsamunam jimi-ará uwí pujusmiayi. Tura ashí aents nin iyutaj tusa wearmia nuna ni jeen itiaamiayi. ³¹ Tuma asamtai Papru arantutsuk urukuk Yus akupeamunam ati, Uunt Jesukrístu túramurincha ashí etserkamiayi. Nútiksan etserkatniuncha Páprun penké suritkiacharmiayi.

**Yus Papi: Shuarjai Yus Yamaram Chicham
Najanamu
New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

fb10d1f0-e2d5-5d8e-8a74-10846708c857